

BOSNA I HERCEGOVINA
CENTRALNA IZBORNA KOMISIJA
SREDIŠNJE IZBORNO POVJERENSTVO



БОСНА И ХЕРЦЕГОВИНА
ЦЕНТРАЛНА ИЗБОРНА КОМИСИЈА

PRAVILNIK
o provođenju izbora u Bosni i Hercegovini

Sarajevo, maj 2022. godine



PRAVILNIK
o provođenju izbora u Bosni i Hercegovini

Sarajevo, maj 2022. godine

Na osnovu člana 2.9 stav (1) tačke 2. i 7, a u vezi s članom 1.5, 5.3 stav (1), 5.4, 5.6 stav (2), 5.7 stav (1) 5.10, 5.21, 5.22 stav (1), 5.26 stav (1), 5.27 stav (1), 5.29 i 5.32 stav (2) i Poglavlja 14. Izbornog zakona Bosne i Hercegovine ("Službeni glasnik BiH", broj: 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20), Centralna izborna komisija Bosne i Hercegovine je na 17. sjednici, održanoj 04.05.2022. godine, donijela

PRAVILNIK o provođenju izbora u Bosni i Hercegovini

DIO PRVI – UVODNE NAPOMENE

Član 1. (Predmet)

Pravilnikom o provođenju izbora u Bosni i Hercegovini (u daljnjem tekstu: Pravilnik) utvrđuje se:

- a) kontrola, pakiranje, dostava i predaja izbornog materijala od Centralne izborne komisije Bosne i Hercegovine (u daljnjem tekstu: Centralna izborna komisija BiH) prema općinskoj izbornoj komisiji, gradskoj izbornoj komisiji i Izbornoj komisiji Brčko distrikta Bosne i Hercegovine (u daljnjem tekstu: izborna komisija) – član 5.4 stav (3);
- b) dužnost predsjednika biračkog odbora i uloga člana biračkog odbora, kontrola, dostava i predaja izbornog materijala od izborne komisije na biračka mjesta, način glasanja i utvrđivanja izbornih rezultata na biračkim mjestima, način brojanja glasačkih listića i glasova na redovnim biračkim mjestima, biračkim mjestima za glasanje u odsustvu, biračkim mjestima u diplomatsko-konzularnim predstavništvima Bosne i Hercegovine (u daljnjem tekstu: DKP BiH), glasača koji glasa putem mobilnog tima, posebnog mobilnog tima i putem pošte, obrasci na biračkim mjestima i način glasanja birača koji glasa izvan Bosne i Hercegovine i način primopredaje izbornog materijala između izborne komisije i Centralne izborne komisije BiH nakon dana održanih izbora – član 1.5 stav (3), 3.17 stav (3), 5.3 stav (1), 5.4, 5.6 stav (2), 5.7 stav (1), 5.21, 5.22 stav (1) i 5.24;
- c) način pakiranja izbornog materijala na redovnim biračkim mjestima, na biračkim mjestima za glasanje u odsustvu, na biračkim mjestima ovlaštenim za glasanje nepotvrđenim-kovrtiranim glasačkim listićima, mobilnim timovima – 5.26 stav (1) i posebnim mobilnim timovima i
- d) način i rokovi za objavu preliminarnih, nezvaničnih i nekompletnih rezultata izbora (u daljnjem tekstu: nepotpuni preliminarni izborni rezultati), nakon utvrđivanja rezultata glasanja na biračkom mjestu, način i rokovi brojanja glasačkih listića od strane izborne komisije u cilju objedinjavanja utvrđenih izbornih rezultata, obrada i kontrola utvrđenih izbornih rezultata od strane izborne komisije i Centralne izborne komisije BiH, način i rokovi za objavu izbornih rezultata i stavljanje na uvid javnosti tabelarnog prikaza izbornih rezultata, način i rokovi za potvrđivanje izbornih rezultata i objava raspodijeljenih mandata po političkim subjektima i kandidatima unutar tih političkih subjekata – član 5.27 stav (1), 5.29 i 5.32 stav (2).

Član 2. (Pojmovi)

Pojedini izrazi korišteni u ovom Pravilniku znače:

1. "**Birač**" je državljanin Bosne i Hercegovine koji je upisan u Centralni birački spisak;
2. "**Biračko mjesto u DKP-u BiH**" je biračko mjesto gdje svoje biračko pravo može ostvariti birač koji je upisan u izvod iz Centralnog biračkog spiska za glasanje izvan Bosne i Hercegovine za glasanje u DKP-BiH;
3. "**Biračko mjesto za glasanje u odsustvu**" je biračko mjesto na kojem biračko pravo ostvaruje raseljeno lice kod kojeg se osnovna izborna jedinica za koju glasa razlikuje od osnovne izborne jedinice trenutnog boravišta;
4. "**Biračko mjesto za glasanje nepotvrđenim glasačkim listićima**" je biračko mjesto na kojem biračko pravo može ostvariti birač koji je upisan u izvod iz Centralnog biračkog spiska za glasanje izvan BiH, a na dan održavanja izbora zatekne se u zemlji, kao i redovni birač koji se ne nalazi na zaključenom izvodu iz Centralnog biračkog spiska, a posjeduje važeći identifikacioni dokument iz člana 5.12 Izbornog zakona BiH i potvrdu o mjestu prebivališta, odnosno dokaz o entitetskom državljanstvu za glasanje u Brčko distriktu BiH;
5. "**Birački paket**" je materijal za glasanje koji Centralna izborna komisija BiH, preporučenom poštom, dostavlja biraču koji je upisan u Izvod iz Centralnog biračkog spiska za glasanje putem pošte;
6. "**Glasač**" je državljanin Bosne i Hercegovine koji je upisan u Centralni birački spisak i koji je ostvario aktivno biračko pravo;
7. "**Izborna jedinica**" podrazumijeva:
 - a) osnovnu izbornu jedinicu koja podrazumijeva općinu, grad Banju Luku, Brčko distrikt BiH, gradsku izbornu jedinicu Grada Mostara i izborne jedinice gradskog područja Grada Mostara u kojoj se bira i konstituira ukupan broj predstavnika za određeni nivo vlasti i koje unutar sebe nemaju višečlane izborne jedinice,
 - b) kantonalnu izbornu jedinicu u kojoj se bira i konstituira ukupan broj predstavnika za određeni nivo vlasti i koje unutar sebe nemaju višečlane izborne jedinice,
 - c) entitetsku izbornu jedinicu u kojoj se bira i konstituira entitetski nivo vlasti, koje unutar sebe imaju višečlane izborne jedinice i entitetsku izbornu jedinicu u kojoj se bira državni nivo vlasti;
8. "**Izbjeglo lice**" podrazumijeva državljanina Bosne i Hercegovine koji ima biračko pravo i boravi u inozemstvu u statusu izbjeglog lica iz BiH;
9. "**Izborni materijal**" je materijal koji se koristi na biračkom mjestu i dijeli se na osjetljivi i neosjetljivi izborni materijal;
10. "**Instrukcijsko pismo**" je uputa biraču koji glasa putem pošte o načinu prijema i slanja povratne koverta;
11. "**JIIS BiH aplikacija**" podrazumijeva računarski softver za unos i obradu izbornih rezultata po biračkim mjestima, izbornim jedinicama i ukupnih izbornih rezultata političkih subjekata;
12. "**Kombinacija**" je set svih glasačkih listića, za sve nivoe vlasti za koje se provode izbori, koje birač na biračkom mjestu preuzme od člana biračkog odbora koji izdaje glasačke listiće;
13. "**Kutija**" je ambalaža koja sadrži određeni broj vakuum pakovanja sa glasačkim listićima za određenu izbornu jedinicu;
14. "**Koverta za glasanje nepotvrđenim-kovertiranim glasačkim listićima**" je koverta u koju se pakiraju glasački listići za glasanje nepotvrđenim-kovertiranim glasačkim listićima sa zaštitnom kovertom;

15. **“Komplet“** je zaštitna koverta sa glasačkim listićima koja se ubacuje u personaliziranu kovertu;
16. **“Mobilni tim“** je birački odbor koji omogućava glasanje biraču koji je vezan za domove i ustanove;
17. **“Nepotvrđeni glasački listić“** je glasački listić identičnog dizajna i sadržaja kao običan glasački listić koji se nakon glasanja stavlja u posebnu kovertu i koji se ne prebrojava na redovnom biračkom mjestu, već se broji u Centru za brojanje nakon provjere biračkog prava;
18. **“Prebivalište“** je općina ili distrikt u kojoj se državljanin nastanio sa namjerom da tamo stalno živi;
19. **“Poseban mobilni tim“** je birački odbor koji omogućava glasanje biraču koji je pozitivan na Covid-19 i/ili biraču kojem je zbog sumnje na zarazu uzrokovanu virusom Covid-19 određena izolacija/samoizolacija;
20. **“Paket sa glasačkim listićima“** je paket koji sadrži odgovarajući broj vakuum pakovanja sa glasačkim listićima;
21. **“Paleta“** je ambalaža koja sadrži određeni broj kutija u kojima su vakuum pakovanja za određenu izbornu jedinicu;
22. **“Personalizirana koverta“** je koverta na koju se upisuje ime/ime oca/prezime i JMB birača koji je glasao putem mobilnog tima i posebnog mobilnog tima;
23. **“Pomoćna glasačka kutija“** je kartonska glasačka kutija za glasanje putem mobilnog tima;
24. **“PLD vrećica“** je vrećica u kojoj se pakira i zatvara štambilj nakon zatvaranja biračkog mjesta;
25. **“Povratna koverta“** je koverta sa odštampanom (povratnom) adresom Centralne izborne komisije BiH u kojoj birač koji glasa putem pošte dostavlja materijal za glasanje Centralnoj izbornoj komisiji BiH;
26. **“Pomoć drugog lica“** je pravo birača koji je slijep, nepismen ili fizički nesposoban da koristi pomoć drugog lica prilikom glasanja;
27. **“Proporcionalna zastupljenost“** je pojam koji se u svrhu ovog Pravilnika koristi na obrascima prilikom brojanja glasova datih kandidatima unutar političkog subjekta – lični glasovi u izbornom sistemu proporcionalne zastupljenosti;
28. **“Raseljeno lice“** podrazumijeva državljanina Bosne i Hercegovine kojem je status raseljenog lica utvrdio nadležni organ uprave za pitanja raseljenih lica u skladu sa zakonom;
29. **“Redovno biračko mjesto“** je biračko mjesto na kojem biračko pravo ostvaruje birač koji glasa za osnovnu izbornu jedinicu trenutnog prebivališta/boravišta.
30. **“Sistem većinskog glasa“** je izborni sistem prema kojem mandat dobija kandidat koji osvoji najviše glasova;
31. **“Štambilj“** je pomoćno sredstvo pomoću kojeg se na glasačkom listiću stavlja otisak sa podacima koje propiše Centralna izborna komisija BiH;
32. **“U-folija“** je providna plastična folija u koju se pakira izborni materijal;
33. **“Višečlana izborna jedinica“** podrazumijeva izbornu jedinicu u kojoj se bira više od jednog a manje od ukupnog broja predstavnika za određeni nivo vlasti;
34. **“Vodič za glasanje putem pošte“** podrazumijeva pisanu instrukciju za birače o načinu glasanja putem pošte;
35. **“Vakuum pakiranje“** je pakovanje propisanog broja glasačkih listića istog tipa zapakiranih u providnu foliju iz koje je izvučen zrak;
36. **“Zaštitna koverta“** je koverta u koju birač na biračkom mjestu za glasanje nepotvrđenim glasačkim listićima i birač koji glasa putem mobilnog tima ubacuju svoje glasačke listiće i koja se nakon toga ubacuje u personaliziranu kovertu;

DIO DRUGI – PROVOĐENJE OPĆIH IZBORA

POGLAVLJE I. PRIMOPREDAJA IZBORNOG MATERIJALA

Član 3. (Izborni materijal)

(1) Centralna izborna komisija BiH osigurava svim formiranim biračkim mjestima, osim za biračka mjesta iz ovog Poglavlja, Odjeljak C, izborni materijal koji se sastoji od:

a) osjetljivog izbornog materijala:

- 1) glasački listići,
- 2) obrazci iz člana 93. ovog Pravilnika i
- 3) izvodi iz konačnog Centralnog biračkog spiska po biračkim mjestima (za birača koji glasa na redovnom biračkom mjestu, birača koji ima status raseljenog lica, birača koji ima pravo glasati nepotvrđenim glasačkim listićima i birača koji ima pravo glasati putem posebnog mobilnog tima) i
- 4) štambilj iz člana 2. stav (1) tačka 31. ovog Pravilnika.

b) neosjetljivog izbornog materijala:

- 1) kandidatske liste i
- 2) dio potrošnog biračkog materijala (poster, glasačke kabine i dr.).

(2) Centralna izborna komisija BiH odgovorna je za distribuciju i sigurnost izbornog materijala iz stava (1) ovog člana do izborne komisije.

(3) Izborna komisija, od momenta preuzimanja izbornog materijala od Centralne izborne komisije BiH odgovorna je za dostavu i raspodjelu izbornog materijala po biračkim odborima na području osnovne izborne jedinice i za njegovu sigurnost do momenta predaje biračkim odborima. Izborna komisija je od momenta preuzimanja cjelokupnog izbornog materijala od biračkih odbora odgovorna za sigurnost izbornog materijala, do njegovog uručenja Centralnoj izbornoj komisiji BiH.

(4) Za primopredaju izbornog materijala iz stava (3) ovog člana od i prema Centralnoj izbornoj komisiji BiH odgovoran je predsjednik izborne komisije ili član izborne komisije kojeg ovlasti predsjednik.

(5) Glasački listići iz stava (1) tačka a) alineja 1. ovog člana su:

- a) glasački listići za redovno biračko mjesto,
- b) glasački listići sa posebnom oznakom za glasanje u DKP-ima i
- c) glasački listići sa posebnom oznakom za glasanje putem pošte.

(6) Glasački listići sa posebnom zaštitom za glasanje u DKP-ima imaju otisak štambilja sa nazivom odgovarajućeg DKP BiH, a glasački listići za glasanje putem pošte imaju oznaku "POŠTA/ПОШТА".

Član 4.

(Dostava izbornog materijala – član 5.3 Izbornog zakona BiH)

Centralna izborna komisija BiH dostavlja izornoj komisiji izborni materijal iz člana 3. stav (1) tačka a) alineje 1), 2) i 4) i tačke b) alineje 1) ovog Pravilnika, najkasnije tri dana prije dana održavanja izbora, a iz tačke a) alineja 3) i neosjetljivi izborni materijal iz tačke b) alineja 2) ovog Pravilnika, najkasnije 20 dana prije dana održavanja izbora.

Član 5.

(Obrasci PO-1 i PO-2 – član 5.4 stav (2) Izbornog zakona BiH)

(1) Nadležna izborna komisija dužna je tokom preuzimanja izbornog materijala od Centralne izborne komisije BiH provjeriti ukupan broj primljenih kutija glasačkih listića i preostalog izbornog materijala i potvrditi prijem u odgovarajuće primopredajne obrasce izbornog materijala – obrazac PO-1 i obrazac PO-2.

(2) Potpisanu kopiju obrazaca iz stava (1) ovog člana izborna komisija zadržava za svoje potrebe, a ostale kopije zadržava Centralna izborna komisija BiH.

(3) Ukoliko izborna komisija, nakon prijema izbornog materijala iz stava (1) ovog člana, uoči određene nedostatke u pogledu količine i vrste primljenog izbornog materijala, dužna je odmah, a najkasnije u roku od 12 sati od prijema izbornog materijala, pismeno izvijestiti Centralnu izbornu komisiju BiH kako bi se otklonili uočeni, ali opravdani nedostaci.

Član 6.

(Pakiranje i primopredaja glasačkih listića – član 5.4 stav (1) i (3) Izbornog zakona BiH)

(1) Glasački listići dostavljaju se izornoj komisiji zapakirani u odgovarajući broj paleta u zavisnosti od ukupnog broja kutija glasačkih listića koji se isporučuju datoj osnovnoj izornoj jedinici.

(2) Vakuum pakiranja sa glasačkim listićima za biračka mjesta na teritoriji date osnovne izborne jedinice zapakirani su u kutije. Svako biračko mjesto dobija jednu ili više kutija s glasačkim listićima odgovarajućeg tipa u zavisnosti od tipa biračkog mjesta (redovno biračko mjesto ili biračko mjesto za glasanje u odsustvu).

(3) Svaka paleta s glasačkim listićima označava se sljedećim podacima:

- a) jedinstvenom oznakom, odnosno serijskim brojem palete;
- b) nazivom osnovne izborne jedinice;
- c) brojem kutija koje se nalaze na paleti;
- d) brojevima biračkih mjesta na koje se kutije s te palete odnose i
- e) podacima o ukupnom broju i tipu glasačkih listića koji se nalaze na paleti.

- (4) Svaka kutija s glasačkim listićima označava se sljedećim podacima:
- a) brojem biračkog mjesta;
 - b) nazivom osnovne izborne jedinice;
 - c) oznakom tipa glasačkih listića koji su zapakirani u kutiju;
 - d) podacima o ukupnom broju glasačkih listića zapakiranih u kutiju i
 - e) podacima o rednom broju kutije i ukupnom broju kutija za dato biračko mjesto.
- (5) Centralna izborna komisija BiH će posebnom odlukom odrediti lica koja će vršiti nadzor nad izradom papira za glasačke listiće sa vodenim žigom i njegovog pakiranja na palete.
- (6) Centralna izborna komisija BiH će tokom štampanja i pakiranja glasačkih listića u štampariji posebnom odlukom imenovati komisiju iz reda zaposlenih Sekretarijata Centralne izborne komisije BiH za stalni nadzor i kontrolu štampanja i pakiranja glasačkih listića, što podrazumijeva i kontrolna brojanja, metodom slučajnog uzorka, glasačkih listića prije pakiranja u plastične folije. Ovom odlukom će Centralna izborna komisija BiH odrediti i jednog člana Centralne izborne komisije BiH za koordinaciju rada ove komisije.
- (7) Lica iz stava (5), odnosno komisija iz stava (6) ovog člana dužna je redovno dostavljati informaciju u pisanom obliku o toku realizacije određenih aktivnosti, te po završetku podnosi pisani izvještaj o izvršenom nadzoru i kontroli izrade papira za glasačke listiće, odnosno štampanju i pakiranju glasačkih listića.

Član 7.

(Redovno biračko mjesto – član 5.4 stav (1) i (3) Izbornog zakona BiH)

- (1) Redovno biračko mjesto dobija broj glasačkih listića prema broju birača na izvodu iz Centralnog biračkog spiska za određeno biračko mjesto, koji se zaokružuje na sljedećih 10.
- (2) Paketi s glasačkim listićima za redovno biračko mjesto sadrže odgovarajući broj vakuum pakiranja od 100 glasačkih listića istog tipa. Ako je broj glasačkih listića za određeno redovno biračko mjesto manji od 100, ili ako ukupan broj listića nije djeljiv sa 100, ostatak glasačkih listića će biti smješten u posebno vakuum pakovanje, ako ta razlika bude veća od 50. Ako ta razlika bude iznosila 50 ili manje glasačkih listića, listići će biti smješteni u isto pakiranje sa 100 listića.
- (3) Svako vakuum pakiranje označava se podacima o tipu glasačkih listića, brojem redovnog biračkog mjesta, nazivom i kodom osnovne izborne jedinice i ukupnim brojem glasačkih listića koji se nalaze u pakiranju, uz numeraciju broja pakiranja za svaki nivo na način koji odredi Centralna izborna komisija BiH.

Član 8.

(Biračko mjesto za glasanje nepotvrđenim-kovertiranim glasačkim listićima)

- (1) Centralna izborna komisija BiH za biračka mjesta određena za glasanje nepotvrđenim-kovertiranim glasačkim listićima pakira glasačke listiće u kovertu za glasanje nepotvrđenim-kovertiranim glasačkim listićima sa zaštitnom kovertom.
- (2) Kovertu iz stava (1) ovog člana se pakiraju u kartonske kutije na kojoj se nalazi broj biračkog mjesta, naziv osnovne izborne jedinice, broj koverata i potpis ovlaštenog lica Centralne izborne komisije BiH.

(3) Ukupan broj koverti s glasačkim listićima iz stava (1) ovog člana iznosi 5% od broja birača sa spiska birača koji imaju pravo glasati nepotvrđenim-kovertiranim glasačkim listićima, uvećan za broj birača koji su glasali nepotvrđenim-kovertiranim glasačkim listićima na zadnjim provedenim izborima zaokružen na prvih 10.

Član 9. **(Biračko mjesto za glasanje u odsustvu)**

(1) Glasački listići za glasanje u odsustvu su zapakirani u kovertu u kojima se nalazi odgovarajuća kombinacija glasačkih listića po osnovnim izbornim jedinicama za koje su birači upisani u izvod iz Centralnog biračkog spiska za birače koji imaju status raseljenog lica.

(2) Ukupan broj različitih kombinacija glasačkih listića posebno se utvrđuje za svake izbore i zavisi od vrste izbora koji se provode.

(3) Broj različitih kombinacija glasačkih listića koje dobija jedna osnovna izborna jedinica određen je brojem birača koji su upisani u izvod iz Centralnog biračkog spiska za birače koji imaju status raseljenog lica.

(4) Šifra određene kombinacije glasačkih listića i nazivi osnovnih izbornih jedinica na koje se kombinacija odnosi odštampani su na svakoj koverti s kombinacijom glasačkih listića za glasanje u odsustvu.

(5) Biračko mjesto za glasanje u odsustvu dobija odgovarajući broj koverti s kombinacijama glasačkih listića prema broju birača u izvodu iz Centralnog biračkog spiska za birače koji imaju status raseljenog lica. Ovom broju dodaje se po jedna rezervna kombinacija za svaku izbornu jedinicu za koju su upisani birači u izvod iz Centralnog biračkog spiska za birače koji imaju status raseljenog lica.

(6) Kovertu s kombinacijama glasačkih listića za glasanje u odsustvu pakiraju se u kutije, s tim da su različite kombinacije unutar svake kutije posebno odijeljene. Na svakoj kutiji za biračka mjesta za glasanje u odsustvu, osim podataka koje sadrže i kutije s glasačkim listićima za redovna biračka mjesta, uključujući i listu kombinacija s glasačkim listićima koja se nalazi u kutiji s naznačenim brojem koverti za svaku kombinaciju.

Član 10. **(Mobilni tim)**

(1) Glasački listići za mobilni tim pakiraju se u zaštitne kovertu na kojima je upisan broj kombinacije.

(2) Kovertu iz stava (1) ovog člana i personalizirane kovertu se pakiraju u kartonsku kutiju na kojoj se nalazi broj mobilnog tima, broj koverata i potpis ovlaštenog lica Centralne izborne komisije BiH.

(3) Ukupan broj kompleta s glasačkim listićima iz stava (2) ovog člana jednak je broju birača na izvodu iz Centralnog biračkog spiska za mobilni tim:

- a) zaokružen na prvih 10 ukoliko su birači koji glasaju putem mobilnog tima iz te osnovne izborne jedinice i

- b) uvećan za jedan ukoliko je broj birača do pet, za dva ukoliko je broj birača do deset i za tri ukoliko je broj birača veći od deset za birače koji glasaju putem mobilnog tima, a nisu iz te osnovne izborne jedinice.

Član 11.

(Zapisnik o radu biračkog odbora – član 5.7 stav (1) Izbornog zakona BiH)

- (1) Za svako biračko mjesto birački odbor dužan je voditi Zapisnik o radu biračkog odbora ZARBO (u daljnjem tekstu: Zapisnik o radu biračkog odbora) koji je sastavni dio ovog Pravilnika. Zapisnik o radu biračkog odbora je sačinjen tako da svaka stranica ima svoju kopiju na kojoj se preslikavaju podaci upisani na stranici. Svaka stranica obavezno sadrži broj biračkog mjesta. Za biračke odbore u Brčko distriktu BiH sačinjen je Zapisnik o radu biračkog odbora koji ima dvije originalne stranice i koje imaju svoje kopije.
- (2) U Zapisnik o radu biračkog odbora se upisuju podaci navedeni u članu 5.7 stav (1) tačka 1. do 4. Izbornog zakona BiH, te primjedbe i mišljenja člana biračkog odbora, birača ili akreditiranog posmatrača vezano za proces glasanja na način propisan članom 5.7 stav (2) Izbornog zakona BiH.
- (3) U slučaju da je članu biračkog odbora, biraču ili akreditiranom posmatraču onemogućen upis primjedbe ili mišljenja u Zapisnik o radu biračkog odbora, svoje primjedbe ili mišljenja dostavljaju direktno izornoj komisiji o čemu izborna komisija bez odlaganja obavještava Centralnu izbornu komisiju BiH.
- (4) Zapisnik o radu biračkog odbora se dostavlja Centralnoj izornoj komisiji BiH u skladu sa članom 61. stav (7), 62. stav (7), 63. stav (1), 64. stav (1) i 65. stav (1) ovog Pravilnika, a izornoj komisiji u skladu članom 61. stav (8), 62. stav (8), 63. stav (2), 64. stav (2) i 65. stav (2) ovog Pravilnika.

Član 12.

(Predaja izbornog materijala izornoj komisiji – član 5.26 Izbornog zakona BiH)

- (1) Nakon zatvaranja biračkih mjesta i okončanja procesa brojanja i svih aktivnosti na biračkom mjestu, birački odbor dostavlja izornoj komisiji spakovan izborni materijal na način propisan članom 61. do 65. ovog Pravilnika.
- (2) Izborna komisija pri preuzimanju izbornog materijala od biračkog odbora provjerava da li je izborni materijal spakiran na propisan način i potvrđuje prijem u primopredajnom obrascu izbornog materijala BO-İK. Ukoliko uoči da izborni materijal nije propisno spakiran ili da određeni materijal nedostaje, poziva birački odbor da ukloni uočene nedostatke pod kontrolom izborne komisije.
- (3) Izborna komisija priprema izborni materijal s biračkih mjesta za predaju Centralnoj izornoj komisiji BiH.

Član 13.
(Predaja izbornog materijala Centralnoj izbornoj komisiji BiH – član 5.27
Izbornog zakona BiH)

(1) Centralna izborna komisija BiH prilikom preuzimanja izbornog materijala od izborne komisije provjerava da li je izborni materijal spakiran u skladu s čl. 61. do 65. ovog pravilnika, potvrđuje prijem u odgovarajuće primopredajne obrasce izbornog materijala, kako slijedi:

- a) primopredajni obrazac biračkog materijala PO-3 – izborni materijal s biračkih mjesta za glasanje u odsustvu i nepotvrđenim glasačkim listićima;
- b) primopredajni obrazac biračkog materijala PO-4 – dokumentacija za Centralnu izbornu komisiju BiH i
- c) primopredajni obrazac biračkog materijala PO-5 – izborni materijal s redovnih biračkih mjesta.

(2) U slučaju da osnovna izborna jedinica ima veći broj biračkih mjesta od broja rubrika navedenih u primopredajnom obrascu, upotrijebit će veći broj prethodno pripremljenih primopredajnih obrazaca, uz naznaku na svakom obrascu o nazivu i šifri osnovne izborne jedinice za koju se obrazac popunjava.

(3) Centralna izborna komisija BiH pri preuzimanju izbornog materijala od izborne komisije osnovne izborne jedinice provjerava da li je izborni materijal spakiran na propisan način i potvrđuje prijem u primopredajnom obrascu izbornog materijala. Ukoliko uoči određene nedostatke, nalaže izbornoj komisiji da otkloni uočene nedostatke.

(4) Potpisanu kopiju obrazaca iz stava (1) ovog člana izborna komisija zadržava za svoje potrebe, a ostale kopije zadržava Centralna izborna komisija BiH.

Član 14.
(Glasačka kutija)

(1) Izborna komisija dužna je glasačke kutije propisno uskladištiti, evidentirati njihovo brojno stanje i eventualna oštećenja i nedostatke te čuvati za potrebe narednih izbora kao stalno materijalno sredstvo.

(2) Evidenciju brojnog stanja glasačkih kutija iz stava (1) ovog člana izborna komisija dostavlja Centralnoj izbornoj komisiji BiH uz redovni izvještaj o radu.

(3) Vrste i postupanje sa glasačkom kutijom Centralna izborna komisija BiH će regulirati posebnim propisom.

Član 15.
(Dužnost predsjednika biračkog odbora i uloga članova
biračkog odbora u procesu glasanja)

(1) Predsjednik upravlja radom biračkog odbora i zajedno s članovima biračkog odbora odgovoran je za zakonitost rada na biračkom mjestu; održava integritet procesa glasanja, odnosno brojanja i održava mir i red na biračkom mjestu i njegovoj okolini; popunjava sve potrebne obrasce; osigurava da na biračkom mjestu ne bude oružja ili opasnih predmeta; pomaže biračima kojima treba dodatno

objašnjenje o procesu glasanja; rješava sva pitanja koja se odnose na identifikaciju i pravo glasa birača i evidentira u Zapisnik vrijeme i okolnosti svih iznimnih događaja na biračkom mjestu, na način da na svaku primjedbu upisanu u Zapisnik napiše šta je poduzeo ukoliko je primjedba osnovana i određuje dužnosti svakom članu biračkog odbora. Eventualni prekid rada u brojanju glasačkih listića predsjednik ili zamjenik predsjednika evidentira u zapisnik o radu biračkog odbora u dio Z8. Predsjednik biračkog odbora za birača čije ime nije upisano na biračkom spisku na tom biračkom mjestu je obavezan da izvrši provjeru sa nadležnom izbornom komisijom na kojem biračkom mjestu taj birač glasa. Ukoliko budu ispunjeni tehnički uvjeti, predsjednik biračkog odbora na pogodan način dostavlja (komunikacijom putem adekvatne aplikacije) izornoj komisiji preliminarne rezultate po političkim subjektima, odmah nakon prebrojavanja svakog nivoa koji se prebroji i popunjavanja obrasca za preliminarne rezultate, izuzetno ukoliko za navedeno ne budu ispunjeni uvjeti, preliminarni rezultati će se dostaviti u skladu sa članom 70 ovog Pravilnika.

(2) Član biračkog odbora zadužen za kontrolu reda osigurava kontrolu kretanja birača na biračkom mjestu.

(3) Član biračkog odbora zadužen za identifikaciju provjerava identitet birača; pronalazi biračevo ime u izvodu iz Centralnog biračkog spiska; upozorava birača da se mora potpisati identično kao na identifikacionom dokumentu i osigurava da se birač potpiše pored svog imena u izvodu iz Centralnog biračkog spiska u odgovarajućem šablonu. Potpis u Izvodu iz Centralnog biračkog spiska mora odgovarati potpisu u dokumentu kojim je izvršena identifikacija.

(4) Član biračkog odbora zadužen za izdavanje glasačkih listića na prednjoj strani glasačkih listića, ispod teksta "Uputstvo za glasanje" u donjem lijevom uglu stavlja otisak štambilja pored kojeg se potpisuje, izdaje glasačke listiće biraču; objašnjava biraču kako treba ispravno ispuniti glasačke listiće i upućuje birača prema slobodnom prostoru na kojem mu se omogućava tajnost glasanja (u daljnjem tekstu: glasačka kabina). Ako birač ošteti glasački listić, postupa se u skladu sa članom 5.20 Zakona, a pod oštećenim glasačkim listićem podrazumijeva se neupotrebljiv glasački listić: fizički oštećen ili pogrešno popunjen glasački listić.

(5) Izgled, sadržaj i način postupanja sa štambiljom utvrđuje se posebnom odlukom Centralne izborne komisije BiH.

(6) Član biračkog odbora zadužen za kontrolu glasačke kutije upućuje birača da ubaci sve preuzete glasačke listiće, jedan po jedan u glasačku kutiju i napusti biračko mjesto; osigurava da nijedan birač ne napusti biračko mjesto dok u glasačku kutiju ne ubaci glasačke listiće i osigurava da se samo glasački listići ubacuju u glasačku kutiju.

(7) Ako se birački odbor sastoji od predsjednika i dva člana, član biračkog odbora zadužen za kontrolu reda istovremeno će obavljati i kontrolu glasačke kutije, dok će član biračkog odbora zadužen za identifikaciju istovremeno obavljati i izdavanje glasačkih listića.

(8) Članovi biračkog odbora individualno odgovaraju za učinjene nepravilnosti u okviru zaduženja koje dobiju od predsjednika biračkog odbora u skladu sa Izbornim zakonom BiH i podzakonskim aktima Centralne izborne komisije BiH.

(9) Predsjednik biračkog odbora odgovoran je i za učinjene nepravilnosti člana biračkog odbora, ukoliko nije evidentirao uočene nepravilnosti i odmah izvijestio nadležnu izbornu komisiju.

(10) Predsjednik i članovi biračkog odbora odgovorni su za osiguranje pravilnosti i tajnosti glasanja, pravilno brojanje, evidentiranje glasačkih listića i ispravno pakiranje izbornog materijala na biračkom mjestu.

(11) Predsjednik i članovi biračkog odbora moraju biti prisutni tokom cijelog procesa glasanja, uključujući i proces brojanja glasačkih listića shodno odredbi člana 5.5 izbornog zakona BiH, osim u slučaju kada je potrebno obaviti glasanje na drugom biračkom mjestu za koje su upisani u izvod iz Centralnog biračkog spiska ili zbog zdravstvenih i drugih opravdanih razloga nisu u mogućnosti da nastave dalje da obavljaju svoje dužnosti.

(12) Predsjednik biračkog odbora je obavezan obavijestiti izbornu komisiju o potrebi njegovog odsustva ili odsustva članova biračkog odbora sa biračkog mjesta, kako bi izborna komisija mogla angažirati njihove zamjenike da dođu na biračko mjesto i preuzmu njihove funkcije. Predsjednik biračkog odbora je obavezan da sve promjene osoblja na biračkom mjestu evidentira u dio Z3 Zapisnika o radu biračkog odbora "Evidencija o prisustvu".

Član 16.

(Dan uoči izbora na redovnom biračkom mjestu – član 5.3 stav (1) Izbornog zakona BiH)

(1) Izborna komisija donosi plan predaje izbornog materijala biračkom odboru.

(2) Prema planu iz stava (1) ovog člana, izborna komisija će dan prije, a najkasnije 12 sati prije otvaranja biračkih mjesta, dostaviti biračkom odboru izborni materijal i to:

- a) izvod iz Centralnog biračkog spiska za određeno biračko mjesto;
- b) odgovarajući broj glasačkih listića;
- c) odgovarajući broj glasačkih kutija;
- d) komplet obrazaca za biračko mjesto;
- e) kandidatske liste, odnosno postere s izgledom glasačkih listića na kojima se glasa u toj izbornoj jedinici;
- f) postere s uputstvima o načinu glasanja i informativnim sadržajima za birače;
- g) Zapisnik iz člana 11. stav (1) ovog Pravilnika i
- h) potrošni materijal prema specifikaciji iz Zapisnika neophodan za proces glasanja i brojanja glasačkih listića;
- i) štambilj za dodatnu zaštitu glasačkih listića.

(3) Birački odbor provjerava da li je izborni materijal koji je primio od izborne komisije kompletan i u ispravnom stanju, i potpisuje u Zapisnik, kao i način skladištenja originalno preuzetog izbornog materijala od momenta preuzimanja do momenta počeka rada biračkog odbora. Ukoliko birački odbor utvrdi da izborni materijal nije kompletan, odmah o tome obavještava izbornu komisiju koja je obavezna da u kontaktu s Centralnom izbornom komisijom BiH otkloni sve nedostatke u najkraćem roku.

(4) Nakon primljenog izbornog materijala predsjednik i članovi biračkog odbora provjeravaju prostor koji je predviđen za biračko mjesto i otklanjaju eventualne nedostatke ako utječu na zakonitost rada biračkog odbora. Zapažanje o stanju biračkog mjesta upisuje se u Zapisnik. Predsjednik i članovi biračkog odbora odgovorni su za sigurnost biračkog materijala na biračkom mjestu od trenutka prijema materijala pa do završetka svih svojih dužnosti nakon zatvaranja biračkog mjesta, okončanja procesa brojanja i uručenja glasačkog materijala. Birački materijal se u noći prije otvaranja biračkog mjesta čuva u zaključanim prostorijama na lokaciji biračkog mjesta.

Policija osigurava birački materijal u noći prije otvaranja biračkih mjesta na lokacijama biračkih mjesta.

(5) Birački odbor uklanja s biračkog mjesta sve oznake i obilježja koja upućuju na političke stranke, vjerske simbole, kao i ostale oznake koje mogu imati diskriminacijsko značenje. Birački odbor postavlja na vidnom mjestu oznaku biračkog mjesta, ulaza i izlaza, smjera lokacije biračkog mjesta, zabrane unošenja i pokazivanja oružja i opasnih predmeta, zabrane pušenja, zabrana upotrebe fotoaparata, kamere, mobitela ili drugih sredstava kojima se može snimiti ili isporučiti zvučni, video ili tekstualni sadržaj na biračkom mjestu od momenta preuzimanja glasačkog listića pa do napuštanja biračkog mjesta, i izlaže kandidatske liste.

(6) Predsjednik i članovi biračkog odbora uređuju biračko mjesto tako da se omogući nesmetano kretanje birača na biračkom mjestu.

Član 17.

(Prije otvaranja biračkog mjesta – član 5.8 Izbornog zakona BiH)

(1) Svi članovi biračkog odbora moraju doći na biračko mjesto najmanje sat vremena prije početka otvaranja biračkog mjesta. U tom vremenskom periodu samo članovi biračkog odbora i akreditirani posmatrači mogu biti prisutni na biračkom mjestu.

(2) Birački odbor određuje mjesto za svaku glasačku kabinu na način da se otvor glasačke kabine okrene prema članovima biračkog odbora i posmatračima, i da bude dovoljno udaljena od članova biračkog odbora, posmatrača ili birača koji se identificira kako se ne bi povrijedila tajnost glasanja birača dok glasa.

(3) Birački odbor na biračkim mjestima na kojima nije omogućen pristup licima iz člana 21. stav (5) ovog Pravilnika određuje posebno mjesto i postavlja glasačku kabinu ispred biračkog mjesta za ovu kategoriju birača.

(4) Prije početka glasanja predsjednik, odnosno članovi biračkog odbora:

- a) ispisuju sve neophodne podatke na kovertu, odnosno pakete;
- b) predsjednik upisuje u Obrazac za brojno stanje broj birača koji su upisani u izvod iz Centralnog biračkog spiska;
- c) ručno broje primljene glasačke listiće za svaki izborni nivo i predsjednik u Obrazac za brojno stanje upisuje ukupan broj primljenih glasačkih listića;
- d) pokazuju praznu glasačku kutiju, nakon čega na nju stavljaju plastične pečate;
- e) predsjednik u Obrazac za brojno stanje upisuje serijske brojeve pečata glasačke kutije;
- f) postavljaju zapečaćenu glasačku kutiju na mjesto gdje je svi prisutni mogu vidjeti;
- g) na vidnom mjestu objavljuju spisak članova biračkog odbora sa naznakom političkog subjekta koji ih je nominirao;
- h) predsjednik upisuje u Zapisnik vrijeme otvaranja biračkog mjesta;
- i) predsjednik provjerava posmatračev identifikacioni dokument s fotografijom, koji zadržava do momenta kada posmatrač napušta biračko mjesto, utvrđuje da li se ime posmatrača nalazi na akreditaciji i u Zapisnik upisuje ime posmatrača, naziv subjekta koji ga je akreditirao, broj njegove akreditacije, vrijeme kada je posmatrač stigao i vrijeme kada je posmatrač napustio biračko mjesto i
- j) predsjednik upućuje posmatrače na mjesto gdje mogu sjesti i posmatrati izborne aktivnosti, te ih upozorava da se ne mogu miješati u izborni proces niti gledati u glasačku kabinu, ali

da mogu postavljati pitanja u vezi s izbornim procesom i stavljati mišljenja ili primjedbe na izborni proces u Zapisnik o radu ili ih predati u pisanoj formi, uz obavezan potpis.

Član 18.

(Postupanje biračkog odbora u slučaju neispravnosti u pakiranjima glasačkih listića)

(1) U slučaju da birački odbor prilikom provođenja procedure propisane članom 17. stav (4) tačka c) ovog Pravilnika utvrdi nepravilnosti:

- a) u vakuum pakiranjima glasačkih listića nađu materijal koji nije glasački listić, ili glasačke listiće na kojima nema odštampanih kandidata, ili glasački listić ne sadrži kandidatske liste za izbornu jedinicu, ili glasačke listiće koje nije propisala Centralna izborna komisija BiH, obavezan je da ih odvoji i utvrdi njihov broj, kao i da utvrdi broj glasačkih listića koji su ispravni,
- b) u vakuum pakiranjima glasačkih listića prime manji broj glasačkih listića od predviđenog broja, a utjecao bi na proces glasanja zbog nedostatka glasačkih listića,

odmah po saznanju o nepravilnostima iz tačke a) i b) ovog stava, obavještava izbornu komisiju.

(2) Izborna komisija po obavještenju biračkog odbora iz stava (1) ovog člana obavezna je otići na biračko mjesto i utvrđenu nepravilnost zapisati u Zapisnik o radu biračkog odbora u dio "Prije otvaranja biračkog mjesta", te dostaviti pisani izvještaj o utvrđenoj nepravilnosti Centralnoj izbornoj komisiji BiH.

(3) Ukoliko navedene nepravilnosti utječu na rad biračkog odbora u smislu nedostatka glasačkih listića za njihov rad, izborna komisija od biračkih odbora, sa bližih biračkih mjesta uzima maksimalno po 100 glasačkih listića, te ih dostavlja biračkom odboru kojem nedostaju glasački listići.

(4) Postupak propisan u stavu (3) ovog člana izborna komisija obavlja zapisnički, a birački odbor iste te činjenice upisuje u Obrazac brojnog stanja u dio 3 "Broj naknadno zaduženih/izuzetih glasačkih listića", gdje birački odbor kojem su izuzeti glasački listići upisuje broj izuzetih glasačkih listića, a birački odbor kojem su dati glasački listići upisuje broj preuzetih glasačkih listića.

POGLAVLJE II. GLASANJE

Odjeljak A. Način provođenja izbora na redovnom biračkom mjestu, biračkom mjestu za glasanje nepotvrđenim glasačkim listićima, biračkom mjestu za glasanje u odsustvu i glasanje birača putem mobilnog tima

Član 19.

(Identifikacija, izdavanje glasačkog listića i glasanje – član 5.13 i 5.16 Izbornog zakona BiH)

(1) Prilikom ulaska na biračko mjesto radi identifikacije i glasanja svaki birač mora predočiti jedan od važećih ličnih dokumenata, u skladu s članom 5.12 Izbornog zakona BiH. Nakon što birač dokaže svoj identitet članu biračkog odbora i njegovo ime bude pronađeno u izvodu iz Centralnog biračkog spiska, birač se potpisuje identično kao na identifikacionom dokumentu pored svog imena u izvodu iz Centralnog biračkog spiska. Član biračkog odbora ima dužost i odgovornost upozoriti svakog

birača da njegov potpis na izvodu iz Centralnog biračkog spiska mora odgovarati potpisu na identifikacionom dokumentu koji predočava članu biračkog odbora radi identifikacije.

(2) Kada birač bude identificiran i potpiše se u izvod iz Centralnog biračkog spiska, član biračkog odbora zadužen za izdavanje glasačkih listića, na svaki glasački listić, na prednjoj stranici ispod teksta "Uputstvo za glasanje" u donjem lijevom uglu stavlja otisak štambilja biračkog mjesta potpisuje se pored štambilja, zatim mu izdaje glasačke listiće i odmah ga upućuje prema jednoj od slobodnih glasačkih kabina kako bi popunio glasačke listiće. U glasačkoj kabini u isto vrijeme smije da se nalazi samo jedno lice, osim ako se radi o biraču iz člana 21. ovog Pravilnika.

(3) Ispunjavanje glasačkog listića na biračkom mjestu je tajno, glasanje je lično. Predsjednik i članovi biračkog odbora dužni su da osiguraju tajnost glasanja i onemogućće da neko lice glasa umjesto drugog lica pod njegovim imenom ili da ponovo glasa.

(4) Nakon popunjavanja glasačkih listića birač ih presavija tako da se zaštiti tajnost glasa i jedan po jedan glasački listić ubacuje u glasačku kutiju. Član biračkog odbora zadužen za kontrolu glasačke kutije vodi računa da svi glasački listići budu ubačeni u glasačku kutiju.

(5) U slučaju da birač ne ubaci sve glasačke listiće koji su mu izdati na biračkom mjestu, član biračkog odbora zadužen za kontrolu glasačke kutije upozorit će ga da je obavezan da to uradi. Ako se birač ogluši na ovo upozorenje, predsjednik biračkog odbora će u Zapisnik o radu biračkog odbora da evidentira ovaj slučaj, zapisujući i podatke s identifikacionog dokumenta birača.

(6) U slučaju da birač pokuša u glasačku kutiju ubaciti glasački listić koji se po boji ili na drugi način razlikuje od originalnih glasačkih listića koji se izdaju na biračkim mjestima, član biračkog odbora zadužen za kontrolu glasačke kutije obavijestit će o tome predsjednika biračkog odbora, koji će prekinuti proces glasanja i uz intervenciju policije taj glasački listić oduzeti biraču. Predsjednik biračkog odbora će u Zapisnik o radu biračkog odbora evidentirati ovaj slučaj, zapisujući i podatke s identifikacionog dokumenta birača. O navedenim slučajevima predsjednik biračkog odbora odmah obavještava izbornu komisiju.

(7) Predsjednik i članovi biračkog odbora, ako im se imena nalaze na izvodu iz Centralnog biračkog spiska za to biračko mjesto, glasaju neposredno poslije otvaranja biračkog mjesta.

(8) Izvod iz Centralnog biračkog spiska za birače u Brčko distriktu BiH sastavljen je iz dva dijela i to tako da je:

- a) dio A sa upisanim imenima birača koji glasaju za sve nivoe vlasti u BiH (osim za nivo kantonalne skupštine), za koje birači glasaju u Federaciji BiH;
- b) dio B sa upisanim imenima birača koji glasaju za sve nivoe vlasti u BiH za koje birači glasaju u Republici Srpskoj.

(9) Član biračkog odbora, biraču iz stava (8) ovog člana izdaje kombinaciju glasačkih listića u zavisnosti od toga da li se biračevo ime nalazi upisano u dijelu A ili B izvoda iz Centralnog biračkog spiska.

Član 20.

(Izdavanje nepotvrdenog-kovetiranog glasačkog listića – član 5.18 Izbornog zakona BiH)

(1) Biraču koji je stjecanjem punoljetstva prvi put upisan u Centralni birački spisak od dana zaključenja Centralnog biračkog spiska do dana izbora, a koji biračkom odboru preda potvrdu izdatu od Centra za birački spisak kojom potvrđuje da se njegovo ime ne nalazi upisano ni na jednom izvodu iz Centralnog biračkog spiska, birački odbor će omogućiti glasanje nepotvrđenim-kovetiranim glasačkim listićima.

(2) Biraču sa prebivalištem u Brčko distriktu BiH čije se ime ne nalazi na izvodu iz Centralnog biračkog spiska, omogućit će se da glasa nepotvrđenim-kovetiranim glasačkim listićima ukoliko birač priloži potvrdu iz stava (1) ovog člana i uvjerenje o entitetskom državljanstvu.

(3) Birački odbor će biraču koji se nalazi na spisku koji je dostavila Centralna izborna komisija BiH o državljanima BiH koji su upisani u izvod iz Centralnog biračkog spiska za glasanje izvan zemlje, a zatekne se u Bosni i Hercegovini, omogućiti da glasa nepotvrđenim-kovetiranim glasačkim listićima.

Član 21.

(Pomoć drugog lica – član 5.19 Izbornog zakona BiH)

(1) Prilikom glasanja birač koji je slijep, nepismen ili fizički nesposoban ima pravo koristiti pomoć drugog lica kojeg on izabere i uz odobrenje predsjednika biračkog odbora.

(2) Član biračkog odbora zadužen za identifikaciju u dio predviđen za potpis upisuje broj identifikacionog dokumenta birača koji glasa, a slijep je, nepismen ili fizički nesposoban i birača koji mu pomaže, pored njegovog potpisa.

(3) Predsjednik biračkog odbora vodi evidenciju o situacijama u kojima se koristi pomoć drugog lica na PDL obrascu. PDL obrazac sadrži sljedeće podatke:

- a) Podatak gdje birač koristi pomoć drugog lica na biračkom mjestu ili izvan biračkog mjesta;
- b) Za birača koji je slijep, nepismen ili fizički nesposoban:
 - ime prezime
 - JMB
 - broj identifikacione isprave;
- c) Za lice koje pruža pomoć biraču:
 - ime i prezime
 - broj identifikacione isprave
 - potpis;
- d) Oznaka da li se radi o slijepom, nepismenom ili fizički nesposobnom licu;
- e) Navod o vrsti dokaza, odnosno broj i datum izdavanja dokaza o činjenici iz tačke d) ovog člana;
- f) Redni broj obrasca;
- g) Broj biračkog mjesta;
- h) Redni broj birača koji se nalazi u izvodu iz Centralnog biračkog spiska;
- i) Potpis predsjednika biračkog odbora.

(4) Dokaz iz stava (3) tačka d) za slijepo i fizički nesposobno lice je rješenje ili uvjerenje/potvrda nadležne ustanove, instituta ili komisije o utvrđenom invaliditetu ili tjelesnom oštećenju, nalaz

medicinske ustanove kojom je izvršena procjena invalidnosti ili tjelesnog oštećenja i članska iskaznica saveza ili udruge registrirane za pomoć ovoj kategoriji lica. Izuzetno predsjednik biračkog odbora može bez dokaza odobriti pomoć drugog lica biraču koji očigledno nije u mogućnosti izvršiti glasanje bez ove pomoći, a zbog svoje nesposobnosti. Dokaz za nepismeno lice iz stava (3) je oznaka "XX" na putnoj ispravi ukoliko je identifikacija birača izvršena pomoću putne isprave, odnosno nepopunjena rubrika za potpis ukoliko je identifikacija izvršena ličnom kartom.

(5) Fizički nesposobni birač je i onaj birač koji dođe do biračkog mjesta, ali zbog fizičkih prepreka i neprilagodbe prostora njegovoj invalidnosti ne može ući. Za ovu kategoriju birača uređuje se posebno mjesto sa glasačkom kabinom, ispred biračkog mjesta, a koje je pogodno za ovu kategoriju birača. Drugo lice koje taj birač izabere donosi važeći identifikacioni dokument fizički nesposobnog birača na biračko mjesto i izjavljuje da birač ne može ući na biračko mjesto. Član biračkog odbora zadužen za identifikaciju provjerava da li je ime fizički nesposobnog birača upisano u izvod iz Centralnog biračkog spiska. Ako je ime tog birača upisano u izvod iz Centralnog biračkog spiska, predsjednik biračkog odbora unosi podatke u evidenciju iz stava (3) ovog člana i odobrava procedure a zatim član biračkog odbora odlazi prema fizički nesposobnom biraču, sa Zapisnikom o radu biračkog odbora ZARBO, glasačkim listićima, olovkom i kovertom. Član biračkog odbora upisuje ime i lične podatke fizički nesposobnog birača s brojem identifikacionog dokumenta. Fizički nesposobni birač potpisuje se pored tih podataka i popunjava glasačke listiće koje stavlja u predviđenu kovertu. Lice koje je fizički nesposobni birač izabrao odnosi kovertu s glasačkim listićima do glasačke kutije, otvara je i stavlja glasačke listiće u nju. Član biračkog odbora u dio predviđen za potpis, pored imena fizički nesposobnog birača upisuje broj identifikacionog dokumenta tog birača. Lice koje pomaže fizički nesposobnom biraču upisuje svoje ime štampanim slovima pokraj imena fizički nesposobnog birača u izvod iz Centralnog biračkog spiska i potpisuje se.

(6) Izborna komisija je obavezna da za svako biračko mjesto odštampa najmanje po 10 PDL obrazaca, koje će numerirati u polje redni broj obrasca, iz stava (3) ovog člana, predati ih predsjedniku biračkog odbora prilikom primopredaje izbornog materijala. Izborna komisija će biračkom odboru u toku glasanja dostaviti dodatni broj obrazaca na zahtjev predsjednika biračkog odbora.

(7) Birački odbor će sve iskorištene obrasce PDL iz stava (3) ovog člana ubaciti u providnu plastičnu foliju koju će se sa izvodom iz Centralnog biračkog spiska upakirati po shemi pakiranja.

Član 22.

(Biračka mjesta za glasanje u odsustvu)

(1) Na biračkim mjestima za glasanje u odsustvu primjenjuju se procedure glasanja utvrđene za redovna biračka mjesta. Biraču koji glasa na biračkom mjestu za glasanje u odsustvu izdaju se koverta koje sadrže glasačke listiće koji se izdaju u osnovnoj izbornoj jedinici za koju birač glasa.

(2) Birački odbor, prije otvaranja biračkog mjesta za glasanje u odsustvu, obavlja iste radnje kao i birački odbor na redovnim biračkim mjestima, kako je utvrđeno članom 17. ovog Pravilnika, osim što na tim biračkim mjestima ručno broje koverta koje sadrže glasačke listiće po osnovnim izbornim jedinicama za koje birači glasaju. Dobijene brojeve prebrojanih koverta predsjednik unosi u Obrazac za brojno stanje.

(3) Član biračkog odbora za izdavanje koverta sa glasačkim listićima, obavezan je da na svaki glasački listić, na prednjoj stranici ispod teksta "Uputstvo za glasanje" u donjem lijevom uglu stavi otisak štambilja biračkog mjesta za glasanje u odsustvu i potpisuje se pored štambilja.

Član 23.

(Glasanje nepotvrđenim-kovetiranim glasačkim listićima – član 3.16 stav (6) i 3.17 Izbornog zakona BiH)

- (1) Po jedno biračko mjesto u svakoj osnovnoj izbornoj jedinici bit će određeno za izdavanje nepotvrđenih-kovetiranih glasačkih listića.
- (2) Nakon što član biračkog odbora zadužen za identifikaciju identificira birača iz člana 20. ovog pravilnika i upiše potrebne podatke u izvod iz Centralnog biračkog spiska za birače koji glasaju nepotvrđenim glasačkim listićima, birač se potpisuje u predviđeno polje za potpis u ovom izvodu.
- (3) Član biračkog odbora zadužen za izdavanje glasačkih listića na osnovu identifikacionog dokumenta birača ispunjava neophodne podatke na prednjoj stranici koverta s nepotvrđenim – kovetiranim glasačkim listićima, na osnovu kojih se može provjeriti biračko pravo. Nakon toga član biračkog odbora zadužen za izdavanje glasačkih listića, na svaki glasački listić, na prednjoj stranici ispod teksta “Uputstvo za glasanje“ u donjem lijevom uglu stavlja otisak štambilja biračkog mjesta za glasanje nepotvrđenim glasačkim listićima i potpisuje se pored štambilja, zatim mu izdaje glasačke listiće i zaštitnu kovertu te ga odmah upućuje prema jednoj od slobodnih glasačkih kabina kako bi popunio glasačke listiće.
- (4) Na prednju stranicu koverta za nepotvrđene-kovetirane glasačke listiće upisuju se sljedeći podaci:
 - a) broj biračkog mjesta;
 - b) prezime i ime birača;
 - c) jedinstveni matični broj birača;
 - d) datum rođenja i
 - e) podaci o nazivu i broju predloženog identifikacionog dokumenta i naziv organa koje je izdalo ovaj dokument.
- (5) Obrazac izgleda koverta sastavni je dio ovog Pravilnika.
- (6) Član biračkog odbora zadužen za izdavanje glasačkih listića zadržava identifikacioni dokument birača do momenta kada birač vrati nepotvrđene-kovetirane glasačke listiće zapakovane u zaštitnoj bijeloj koverti, a dokumentaciju iz člana 20. ovog Pravilnika prilaže uz izvod iz Centralnog biračkog spiska. Član biračkog odbora zadužen za izdavanje glasačkih listića stavlja sigurnosnu bijelu kovertu u kovertu s podacima o biraču koji glasa nepotvrđenim-kovetiranim glasačkim listićima. Koverta se zalijepi i birač je ubacuje u glasačku kutiju.

Član 24.

(Glasanje birača iz člana 5.21 stav (4) Izbornog zakona BiH)

- (1) U svrhu glasanja birača vezanog za domove, hospitaliziranog lica ili birača koji će glasati u zatvorima i pritvorskim jedinicama, izborne komisije će u roku do deset dana prije dana održavanja izbora, uzimajući u obzir teritorijalnu raspoređenost i broj institucija, organizirati mobilne timove koji će na dan izbora posjetiti birača iz ove kategorije u njihovim domovima ili institucijama. Mobilni tim ima jednog predsjednika i dva člana. Predsjednik rukovodi radom mobilnog tima i

odgovoran je za njegovu zakonitost. Izborna komisija jedan sat prije otvaranja biračkih mjesta predaje svakom formiranom mobilnom timu materijal, kako slijedi:

- a) izvod iz Centralnog biračkog spiska za birače koji su prijavljeni za glasanje na ovaj način;
- b) odgovarajući broj glasačkih listića zapakiranih u zaštitne koverte, koje su stavljene u personalizirane koverte na kojima su upisane šifre osnovnih izbornih jedinica za koje se glasa. Obrazac izgleda koverte sastavni je dio ovog pravilnika;
- c) odgovarajući broj pomoćnih glasačkih kutija (kartonske kutije);
- d) Obrazac za brojno stanje – mobilni tim;
- e) potrošni materijal koji je neophodan u procesu glasanja i brojanja glasačkih listića;
- f) Zapisnik o radu biračkog odbora i
- g) spisak birača s adresama i kontakt-telefonima iz tačke a) ovog stava.

(2) Po preuzimanju izbornog materijala od izborne komisije, predsjednik i članovi mobilnog tima:

- a) upisuju svoja imena u Zapisnik i potpisuju se u dijelu Zapisnika koji je za to predviđen;
- b) upisuju broj birača s izvoda iz stava (1) tačka a) ovog člana na predviđeno mjesto u Obrascu za brojno stanje – MOBILNI TIM;
- c) ručno broje primljene personalizirane koverte u kojima su zaštitne koverte sa glasačkim listićima prema šiframa osnovnih izbornih jedinica za koje se glasa, a prema biračkoj opciji birača koji su upisani u izvod iz stava (1) tačka a) ovog člana i upisuju taj broj u Obrazac za brojno stanje;
- d) formiraju pomoćnu glasačku kutiju za mobilni tim i stavljaju papirni samoljepljivi pečat na otvor glasačke kutije i
- e) upisuju serijske brojeve pečata s pomoćne glasačke kutije u Obrazac za brojno stanje.

(3) Prilikom izdavanja glasačkih listića predsjednik mobilnog tima stavlja otisak štambilja mobilnog tima na svaki glasački listić, na prednjoj stranici ispod teksta "Uputstvo za glasanje" uputstva u donjem lijevom uglu, zatim se potpisuje pored štambilja te glasačke listiće i zaštitnu kuvertu daje biraču.

(4) Način glasanja birača s posebnim potrebama ne razlikuje se od načina glasanja utvrđenog članovima 19. i 21. ovog Pravilnika, s tom razlikom što na personaliziranu kovertu upisuju ime / ime oca / prezime birača i JMB koji je glasao putem mobilnog tima. Mobilni tim prilikom rada na terenu, nakon glasanja birača s posebnim potrebama na određenoj lokaciji, samoljepljivom trakom lijepi otvor glasačke kutije koji potpisuju predsjednik i članovi mobilnog tima. Nakon završetka rada na terenu mobilni tim stavlja na otvor pomoćne glasačke kutije samoljepljivi papirni pečat na koji se potpisuju predsjednik i članovi mobilnog tima, a serijski broj pečata evidentira na Obrascu za brojno stanje.

(5) Mobilni tim počinje raditi u 7.00 sati, a završava u 19.00 sati. Mobilni tim u 19.00 sati u sjedištu izborne komisije pakira svoj izborni materijal u skladu s članom 65. ovog Pravilnika i predaje ga izbornoj komisiji.

Član 25.

(Udaljavanje s biračkog mjesta – član 6.5 Izbornog zakona BiH)

(1) Izborna komisija može sa biračkog mjesta udaljiti predsjednika i članove biračkog odbora koji su svojim aktivnostima narušili kontinuitet glasanja, odnosno postupali suprotno pravilima u toku glasanja ili brojanja glasačkih listića. Izborna komisija o tome obavezna je pisanim putem,

obavijestiti Centralnu izbornu komisiju BiH i dostaviti kompletnu dokumentaciju o poduzetim radnjama.

(2) Izborna komisija postupak iz stava (1) ovog člana pokreće po prijavi predsjednika ili člana biračkog odbora, akreditiranih posmatrača ili birača, ili po službenoj dužnosti.

Član 26.

(Zatvaranje biračkog mjesta – član 5.9 stav (2) Izbornog zakona BiH)

(1) Biraču koji je u redu za glasanje u trenutku zatvaranja biračkog mjesta odobrava se glasanje. U tom slučaju birački odbor produžava svoj rad iza 19,00 sati i to najduže do 22,00 sati. Procedura zatvaranja biračkog mjesta je sljedeća:

- a) predsjednik 15 minuta prije zatvaranja biračkog mjesta objavljuje svim prisutnim, unutar i ispred biračkog mjesta, vrijeme zatvaranja biračkog mjesta;
- b) član biračkog odbora zadužen za kontrolu reda u vrijeme zatvaranja biračkog mjesta obavezan je stati na kraj reda kako bi se osiguralo da se nijedno lice ne priključi nakon zatvaranja biračkog mjesta i zatvara vrata odmah nakon što posljednji birač iz reda glasa
- c) predsjednik u Zapisnik upisuje vrijeme zatvaranja biračkog mjesta i zatvara otvor glasačke kutije samoljepljivom trakom i potpisuje je.

(2) Prilikom zatvaranja biračkog mjesta predsjednik u Zapisnik evidentira prisutne akreditirane posmatrače u dijelu Z8 Zapisnika.

Odjeljak B. Način provođenja izbora na biračkim mjestima u DKP BiH – član 1.5 stav (3) Izbornog zakona BiH

Član 27.

(Dostava izbornog materijala)

(1) Centralna izborna komisija BiH će najkasnije deset dana prije otvaranja biračkih mjesta dostaviti Ministarstvu vanjskih poslova BiH izborni materijal i to:

- a) izvod iz Centralnog biračkog spiska za određeno biračko mjesto u DKP BiH;
- b) odgovarajući broj zaštitnih koverata u kojima se nalaze glasački listići sa posebnom zaštitom, a na kojima je ispisan broj kombinacije i naziv izbornih jedinica koji pripadaju toj kombinaciji ;
- c) odgovarajući broj glasačkih kutija;
- d) komplet obrazaca za biračko mjesto;
- e) postere s uputstvima o načinu glasanja i informativnim sadržajima za birače;
- f) Zapisnik i
- g) potrošni materijal prema specifikaciji iz Zapisnika, neophodan za proces glasanja i brojanja glasačkih listića.
- h) Štambilj iz člana 2 stav (1) tačka 31. ovog Pravilnika.

(2) Ministarstvo vanjskih poslova BiH će tri dana prije, a najkasnije 12 sati prije otvaranja biračkih mjesta u DKP BiH, dostaviti biračkom odboru odgovarajućeg DKP-a BiH izborni materijal iz stava (1) ovog člana.

(3) Birački odbor provjerava da li je izborni materijal koji je primio od Ministarstva vanjskih poslova BiH kompletan i u ispravnom stanju, što upisuje u Zapisnik.

(4) Nakon primljenog izbornog materijala, predsjednik i članovi biračkog odbora postupaju u skladu s članom 16. i 17. ovog pravilnika.

Član 28. **(Procedure glasanja)**

(1) Glasanje na biračkom mjestu u DKP BiH se provodi po proceduri utvrđenoj u članu 22. ovog Pravilnika.

(2) Važeći identifikacioni dokument za glasanje birača u DKP BiH je utvrđen u članu 5.12, odnosno 3.15 stav (4) Izbornog zakona BiH.

Odjeljak C. Način glasanja birača koji glasa putem pošte – član 5.21 stav (1) Izbornog zakona BiH

Član 29. **(Birački paket)**

Centralna izborna komisija BiH svim biračima koji su upisani u izvod iz Centralnog biračkog spiska za glasanje putem pošte dostavlja putem preporučene pošiljke birački paket koji sadrži:

- a) Obrazac s ličnim podacima birača: ime i prezime, jedinstveni matični broj, datum rođenja, trenutnu adresu izvan BiH (ulica i broj, grad, poštanski broj, država), kombinacijski broj za glasačke listiće te uputstva kako treba glasati (odštampana na poledini tog obrasca);
- b) odgovarajuće glasačke listiće sa posebnom zaštitom koji se izdaju za osnovnu izbornu jedinicu za koju glasa birač;
- c) povratnu kovertu s odštampanom (povratnom) adresom Centralne izborne komisije BiH i
- d) kovertu za glasačke listiće, koja osigurava tajnost glasanja.

Član 30. **(Povratna koverta)**

Birač koji glasa putem pošte šalje nazad Centralnoj izornoj komisiji BiH povratnu kovertu, koja sadrži:

- a) kovertu za glasačke listiće, koja osigurava tajnost glasa, s upakiranim glasačkim listićima i koja je zalijepljena kako bi se osigurala tajnost glasanja;
- b) kopiju jednog od važećih identifikacionih dokumenata, u skladu s članom 5.12, odnosno članom 3.15 stav (4) Izbornog zakona BiH;
- c) Obrazac s ličnim podacima birača, koji sadrži podatke navedene u članu 29. stav (1) tačka a) ovog Pravilnika.

Član 31. **(Rok za prihvatanje povratne koverta – član 5.21 Izbornog zakona BiH)**

(1) Povratna koverta koja je poslana Centralnoj izornoj komisiji BiH najkasnije na dan održavanja izbora bit će prihvaćena i prebrojana ukoliko stigne u Centralnu izbornu komisiju BiH najkasnije

pet dana od dana održavanja izbora i ako je na povratnoj koverti otisak poštanskog pečata zemlje / bar-koda iz koje se glasa s datumom ne kasnijim od datuma održavanja izbora.

2) U uvjetima izuzetno otežanog ili prekinutog poštanskog prometa uzrokovanog epidemijom virusa COVID-19, kao i u slučaju znatno otežanog poštanskog prometa sa prekookeanskim zemljama, birač može dostaviti nadležnom DKP BiH povratnu kovertu za Centralnu izbornu komisiju BiH u posebnoj koverti koja sadrži poštanski žig zemlje iz koje se glasa, a koji će se prihvatiti i brojati pod uvjetima iz stava (1) ovog člana.

(3) DKP BiH poštu iz stava (2) ovog člana šalje Centralnoj izbornoj komisiji BiH najkasnije u roku od tri dana od dana završetka izbora.

(4) Listu zemalja iz stava (2) ovog člana utvrđuje Centralna izborna komisija BiH na osnovu informacija Ministarstva vanjskih poslova BiH potvrđenih od strane javnih poštanskih operatera.

(5) Instrukcijsko pismo o načinu prijema i slanja povratne koverte iz stava (2) ovog člana Centralna izborna komisija BiH će dostaviti Ministarstvu vanjskih poslova BiH radi obavještenja birača putem DKP BiH.

(6) Odredbe stava (2), (3), (4), (5) i (6) primjenjuju se samo ukoliko Centralna izborna komisija BiH o tome donese posebnu odluku u skladu sa epidemiološkom situacijom u zemlji i mjerama nadležnih organa o čemu će blagovremeno obavijestiti izbornu administraciju i najširu javnost.

Član 32. (Vodič za glasanje putem pošte)

Centralna izborna komisija BiH distribuirat će Vodič za glasanje putem pošte, čiji sadržaj utvrđuje Centralna izborna komisija BiH, preko:

- a) DKP BiH;
- b) klubova i udruženja građana BiH u inozemstvu;
- c) internet-stranice Centralne izborne komisije BiH, naloga Centralne izborne komisije BiH na društvenim mrežama i ostalih autoriziranih internet-stranica i
- d) kancelarija vladinih i nevladinih organizacija koje se bave izbjeglicama i pitanjima migracije.

POGLAVLJE III. OSTVARIVANJE BIRAČKOG PRAVA BIRAČA ZARAŽENIH VIRUSOM COVID-19

Član 33. (Primjena)

Odredbe ovog Poglavlja primjenjuju se samo ukoliko Centralna izborna komisija BiH o tome donese posebnu odluku u skladu sa epidemiološkom situacijom u zemlji i mjerama nadležnih organa o čemu će blagovremeno obavijestiti izbornu administraciju i sve učesnike izbornog procesa.

Član 34. (Ostvarivanje prava na glasanje birača koji su pozitivni na COVID-19 i/ili birača kojima je određena izolacija/samoizolacija)

(1) Biraču čije se ime nalazi na izvodu iz Centralnog biračkog spiska za glasanje na redovnom biračkom mjestu, a koji je pozitivan na COVID-19 i/ili kojem je izrečena mjera nadležnog organa o obaveznoj izolaciji, zbog čega nije u mogućnosti da dođe na biračko mjesto na kojem je upisan u izvod iz Centralnog biračkog spiska da glasa lično, bit će, na njegov zahtjev, omogućeno glasanje putem glasačkog listića iz stava (4) ovog člana, u skladu sa članom 38. ovog Pravilnika.

(2) Da bi ostvario biračko pravo, birač iz stava (1) ovog člana dužan je najkasnije u roku od 72 sata prije dana izbora lično (putem e-maila, fax-aparata ili telefonskih aplikacija osposobljenih za prijem dokumenata, odnosno fotografija dokumenata) ili putem drugog lica, dostaviti izbornoj komisiji, zahtjev za glasanje putem kovertiranog glasačkog listića, odnosno medicinski nalaz koji potvrđuje da je pozitivan na COVID-19 i/ili akt nadležnog organa kojim mu je određena izolacija.

(3) Birač kojem je dijagnosticirano oboljenje COVID-19 nakon isteka roka od 72 sata prije dana izbora, zahtjev za glasanje iz stava (2) ovog člana je dužan dostaviti najkasnije dan prije izbora do 12.00 sati.

(4) Glasanje birača iz stava (1) ovog člana obavlja se putem kovertiranog glasačkog listića koji se izuzima sa redovnog biračkog mjesta, prema proceduri propisanoj čl. 19, 21. i 24. ovog Pravilnika, osim u dijelu koji je drugačije propisan odredbom člana 38. ovog Pravilnika.

(5) Pored jednog ili više mobilnih timova iz člana 24. ovog Pravilnika izborna komisija posebnom odlukom formira najmanje jedan posebni mobilni tim u čijem sastavu je po mogućnosti najmanje jedan zdravstveni radnik. Predsjednik ili najmanje jedan član ovog posebnog mobilnog tima mora biti opremljen specijalnom zaštitnom opremom, koja obavezno sadrži zaštitni kombinezon, masku, zaštitnu kapu, rukavice, adekvatnu zaštitu obuće i po mogućnosti, vizir.

Član 35. **(Plan rada na terenu)**

(1) U svrhu ostvarivanja biračkog prava birača iz člana 34. stav (1) ovog Pravilnika, izborna komisija na osnovu zaprimljene dokumentacije iz člana 34. stav (2) ovog Pravilnika, sačinjava plan rada na terenu koji sadrži spisak birača pozitivnih na COVID-19 i/ili birača kojima je određena izolacija sa njihovim adresama i kontakt-telefonima.

(2) Izborna komisija dužna je omogućiti akreditiranim posmatračima posmatranje rada posebnog mobilnog tima na terenu, a sve uz poštivanje preporuka iz Instrukcije o postupanju organa za provođenje izbora na izborni dan u uvjetima epidemije COVID-19 ("Službeni glasnik BiH", broj 41/20).

(3) U slučaju prijema zahtjeva za glasanje u roku iz člana 34. stav (3) ovog Pravilnika izborna komisija, ukoliko je to moguće, sačinjava dopunu plana rada cijeneći adresu birača, raniji plan rada posebnog mobilnog tima na terenu, kao i vrijeme rada posebnog mobilnog tima – do 19 sati, o čemu na prigodan način obavještava i akreditirane posmatrače.

Član 36. **(Poseban izvod za glasanje)**

(1) Nakon što zaprimi i obradi akte iz člana 34. stav (2) ovog Pravilnika, izborna komisija donosi posebnu odluku i sačinjava poseban izvod za glasanje birača iz člana 34. stav (1) ovog Pravilnika, na način da imena tih birača pronalazi na izvodu iz Centralnog biračkog spiska za glasanje na

redovnom biračkom mjestu ili na drugom izvodu, sa kućnom adresom ili adresom ustanove gdje je taj birač smješten. U rubrici za potpis, čitko upisuje riječi: "Birač COVID-19", prepisuje podatke iz tog izvoda na poseban izvod za birače iz člana 34. stav (1) ovog Pravilnika a zatim sve rubrike na izvodu iz Centralnog biračkog spiska za tog birača precrtava crvenom hemijskom olovkom. Sastavni dio posebnog izvoda je obrazac brojnog stanja (mobilni tim) BSM.

(2) U slučaju zaprimanja zahtjeva u roku iz člana 34. stav (3) ovog Pravilnika izborna komisija će u neposrednom kontaktu sa nadležnim predsjednikom biračkog odbora osigurati da ime tog birača bude uključeno u poseban izvod za glasanje birača iz člana 34. stav (1) ovog Pravilnika. Na ovaj postupak analogno se primjenjuju odredbe iz stava (1) ovog člana.

(3) Kopiju posebnog izvoda iz stava (1) ovog člana izborna komisija dostavlja Centralnoj izbornoj komisiji BiH najkasnije u roku od 48 sati prije dana izbora. O ukupnom broju birača koji uključuje i birače koji su zahtjev podnijeli u roku u iz člana 34. stav (3) ovog Pravilnika i koji su upisani u poseban izvod, iz stava (2) ovog člana, izborna komisija upoznaje Centralnu izbornu komisiju BiH nakon zatvaranja biračkih mjesta.

(4) Sastavni dio posebnog Izvoda za birače iz člana 34. stav (1), čiji broj je sadržan u Obrascu za brojno stanje – Posebnog mobilnog tima za birače COVID-19, čini spisak tih birača sa njihovim adresama i kontakt podacima.

(5) Poseban izvod iz stava (1) ovog člana u gornjem dijelu naslovne stranice sadrži naziv izborne komisije i naziv i kod osnovne izborne jedinice, na sredini sadrži naslov: "Birači COVID-19", a u donjem dijelu sadrži mjesto i datum sačinjavanja ovog posebnog izvoda. Izborna komisija je dužna sve stranice posebnog izvoda numerirati rednim brojem, ovjeriti svaku stranicu pečatom izborne komisije, odštampati ga, uvezati sve stranice jamstvenikom, tj. dvobojnim kanapom za pečačenje i na čvoru ga ovjeriti pečatom izborne komisije.

Član 37.

(Način osiguranja glasačkog materijala)

(1) Za ukupan broj birača iz člana 34. stav (1) ovog Pravilnika izborna komisija odvaja dovoljan broj koverti iz člana 10. stav (1) i (2) ovog Pravilnika koje je dostavila Centralna izborna komisija BiH, a na koju se stavlja naljepnica "COVID-19", kao i posebni izvod iz člana 34. koje potom predaju predsjedniku posebnog mobilnog tima.

(2) Predsjednik biračkog odbora po proceduri iz člana 17. stav (4) tačka b) i člana 18. stav (4) ovog Pravilnika u Obrazac za brojno stanje upisuje ukupan broj birača koji glasaju na tom redovnom biračkom mjestu umanjen za broj birača iz člana 34. stav (1) ovog Pravilnika, kojima je odobreno da glasaju u skladu sa članom 34. ovog Pravilnika.

(3) Nakon što u smislu člana 17. stav (4) tačka c) ovog Pravilnika birački odbor ručno prebroji i utvrdi ukupan broj zaduženih listića za svaki izborni nivo, birački odbor sa redovnog biračkog mjesta u posebnu plastičnu vrećicu sa natpisom "Birači COVID-19" izdvaja potreban broj glasačkih listića za svaki izborni nivo za birače koji glasaju putem Posebnog mobilnog tima na način iz člana 38. ovog Pravilnika i tu nezapečaćenu providnu plastičnu vreću predaje Posebnom mobilnom timu po dolasku na to biračko mjesto. Naprijed opisana radnja se obavezno konstatira u zapisniku o radu biračkog odbora, obrascu brojnog stanja i zapisniku o primopredaji glasačkih listića (ZPGL) koji je sastavni dio ovoga Pravilnika.

(4) Posebni mobilni tim iz člana 34. stav (5) ovog Pravilnika će u skladu sa planom rada na terenu iz člana 35. ovog Pravilnika, obići svako redovno biračko mjesto koje ima evidentirane birače u posebnom izvodu iz člana 36. ovog Pravilnika. Prije nego od predsjednika biračkog odbora na redovnom biračkom mjestu preuzme glasačke listiće iz stava (3) ovog člana, posebni mobilni tim će prebrojati preuzete nezapečaćene kovertne i glasačke listiće za svaki izborni nivo za birača koji glasa putem Posebnog mobilnog tima. Nakon prebrojavanja glasačkih listića predsjednik Posebnog mobilnog tima će upakirati u dovoljan broj kompleta koverata, iz stava (1) ovog člana. Ova radnja se obavezno konstatira u zapisniku o radu biračkog odbora i obrascu brojnog stanja na redovnom biračkom mjestu i u zapisniku o radu Posebnog mobilnog tima.

(5) Posebni mobilni tim zadužuje transparentnu glasačku kutiju, kovertne iz stava (1) ovog člana i ostali potrebni materijal iz člana 16. stav (2) ovog Pravilnika. U obrazac brojnog stanja Posebni mobilni tim upisuje serijski broj pečata transparentne glasačke kutije, te popunjava obrazac brojnog stanja Posebnog mobilnog tima.

(6) Poseban mobilni tim nakon 19.00 sati u sjedištu izborne komisije sa svih zapisnika ZPGL utvrđuje ukupan broj zaprimljenih setova glasačkih listića sa biračkih mjesta i taj broj upisuje u obrazac brojnog stanja.

Član 38.

(Glasanje birača koji su pozitivni na COVID-19 i/ili birača kojima je određena izolacija/samoizolacija)

(1) Glasanje birača iz člana 34. stav (1) ovog Pravilnika provodi se kombinirano na način i po proceduri glasanja za birača koji glasa putem mobilnog tima i birača koji glasa nepotvrđenim – kovertiranim glasačkim listićem, osim u dijelu kojim je drugačije propisano odredbama ovog člana i čl. 34, 35, 36. i 37. ovog Pravilnika.

(2) Glasanje iz stava 1. ovog člana se različito sprovodi u slučajevima:

a) birača koji je pozitivan na COVID-19 i koji se u skladu sa aktom nadležnog organa nalazi se u izolaciji u svom domu i

b) birača koji je na osnovu akta nadležnog organa u izolaciji u svom domu, a za kojeg medicinskim nalazom nije utvrđeno da je pozitivan na COVID-19.

(3) Birač iz stava (2) tačka a) ovog člana glasa isključivo putem drugog lica, koju proceduru odobrava predsjednik mobilnog tima.

(4) Birač iz stava (2) tačka b) ovog člana glasa lično, osim u slučaju iz člana 21. ovog Pravilnika, kada na zahtjev birača predsjednik posebnog mobilnog tima odobrava glasanje putem drugog lica.

(5) Posebni mobilni tim iz člana 34. stav (5) ovog Pravilnika tokom svoga rada ne ulazi u kuću ili stan birača iz člana 34. stav (1) ovog Pravilnika, osim u ustanove ukoliko odlukom nadležnog organa ulaz u tu ustanovu nije zabranjen, te obavezno održava propisanu distancu.

(6) U skladu sa ovim članom, birač iz člana 34. stav (1) ovog Pravilnika, lično, odnosno putem drugog lica koje izabere, prilikom prijema glasačkog materijala, svojom olovkom plave boje, vrši

potpisivanje u poseban izvod iz člana 34. ovog Pravilnika i obavlja glasanje u skladu sa ovim članom, lično, odnosno putem drugog lica.

Član 39.
(Postupanje sa glasačkim materijalom)

(1) Nakon što izvrši sve propisane zadatke posebni mobilni tim iz člana 34. stav (5) ovog Pravilnika, pakira glasački materijal, izvode i zapisnike ZPGL u skladu sa članom 65. ovog Pravilnika i prema shemi pakiranja koja je sastavni dio ovoga Pravilnika na svim vrećama ispisuje naziv i šifru osnovne izborne jedinice i tekst: "Birači COVID-19" koja se sa posebnim izvodom iz člana 36. ovog Pravilnika i ostalim izbornim materijalom dostavlja u izbornu komisiju.

(2) Glasajući materijal upakiran na način iz stava (1) ovog člana se odlaže na posebno odvojeno mjesto u skladištu izborne komisije, gdje se vrši dezinfekcija, a nakon čega u skladu sa planom transporta izbornog materijala dostavlja u Glavni centar za brojanje.

(3) Direktor Glavnog centra za brojanje propisuje proceduru postupanja sa materijalima iz stava (1) ovog člana u skladu sa odredbama Instrukcije o postupanju organa za provođenje izbora na izborni dan u uvjetima epidemije COVID-19 ("Službeni glasnik BiH", broj: 23/20)."

POGLAVLJE IV. BROJANJE GLASAČKIH LISTIĆA I GLASOVA

Odjeljak A. Redovna biračka mjesta – član 5.22 Izbornog zakona BiH

Član 40.
(Vrijeme brojanja)

Glasački listići broje se odmah nakon zatvaranja redovnih biračkih mjesta.

Član 41.
(Redoslijed radnji nakon zatvaranja biračkog mjesta)

(1) Nakon zatvaranja biračkog mjesta u prisustvu akreditiranih posmatrača predsjednik i članovi biračkog odbora:

- a) štambilj iz člana 2. stav (1) tačka 31. ovog Pravilnika, odlaže u providnu PLD vrećicu koja se zatvara i ostavlja na vidno mjesto na radnoj površini,
- b) sve olovke koje nisu crvene boje sa biračkog mjesta se odlažu u vreću za neiskorištene glasačke listiće,
- c) obavezno broje i upisuju ukupan broj preostalih neiskorištenih glasačkih listića za svaki izborni nivo u Obrazac za brojno stanje.
- d) pakiraju neiskorištene glasačke listiće za svaki izborni nivo u originalnu kutiju;
- e) broje i upisuju u Zapisnik o radu biračkog odbora u dio Z9 potpise sa svake stranice Izvoda iz Centralnog biračkog spiska, nakon čega u upisuju ukupan broj potpisa (zbir svih potpisa sa stranica Izvoda iz Centralnog biračkog spiska). Predsjednik taj ukupan broj potpisa upisuje i u Obrazac brojnog stanja. Birački odbor u Brčko distriktu BiH broji potpise i sa Izvoda iz Centralnog biračkog spiska za birače iz FBiH i sa Izvoda za birače iz RS i upisuje u Zapisnik o radu biračkog odbora u dio Z9a i dio Z9b.

- f) Birački odbor odmah nakon utvrđivanja broja potpisa u skladu sa tačkom e) ovog stava Izvod iz Centralnog biračkog spiska odlaže u za to predviđenu kovertu koju preko zalijepljenog otvora lijepi samoljepljivom naljepnicom na kojoj piše "Izvod iz CBS – NE OTVARAJ!"; te je ostavlja na vidnom mjestu na radnoj površini. Nakon završetka svih aktivnosti ova koverta se pakira prema shemi pakiranja.
- g) broje i upisuju broj oštećenih glasačkih listića za svaki izborni nivo i pakiraju ih u odgovarajuću kovertu i
- h) predsjednik i članovi biračkog odbora potpisuju Obrazac za brojno stanje.

(2) Izborni materijal iz stava (1) tačke c) i tačke g) ovog člana birački odbor pakira u providnu veću plastičnu vreću pojedinačno za svaki nivo vlasti.

(3) Popunjavanje svih obrazaca na biračkom mjestu vrši se isključivo hemijskom olovkom crvene boje.

Član 42. **(Redoslijed radnji prilikom brojanja)**

Radnje prilikom brojanja na biračkom mjestu obavljaju se sljedećim redoslijedom:

- a) utvrđivanje glasačkih listića u glasačkoj kutiji;
- b) brojanje glasačkih listića u glasačkoj kutiji;
- c) brojanje glasova (sistem većinskog glasa);
- d) brojanje glasova dobijenih sistemom otvorenih listi – glasovi za političke subjekte;
- e) brojanje glasova dobijenih sistemom otvorenih listi – glasovi za kandidate unutar političkih subjekata.

Član 43. **(Brojanje glasačkih listića – član 5.25 Izbornog zakona BiH)**

(1) Nakon zatvaranja biračkog mjesta u prisustvu akreditiranih posmatrača birački odbor:

- a) otvaraju glasačku kutiju i njen sadržaj stavljaju na pripremljenu radnu površinu za brojanje ;
- b) predočavaju praznu glasačku kutiju prisutnima, dokazujući time da u kutiji nema preostalih glasačkih listića;
- c) razvrstavaju glasačke listiće po izbornim nivoima u grupe glasačkih listića iste boje i u grupe po 25 komada;
- d) slažu grupe od po 25 glasačkih listića jednu na drugu unakrsno;
- e) utvrđuju broj grupa od po 25 glasačkih listića kojima dodaju broj preostalih glasačkih listića kako bi se dobio ukupan broj glasačkih listića;
- f) broj glasačkih listića iz tačke e) ovog člana birački odbor u Brčko distriktu BiH utvrđuje za sva četiri izborna nivoa u RS, te tri izborna nivoa u FBiH, predsjednik upisuje u obrasce za zbirne rezultate i
- g) radnje iz tačke c), d), e) i f) vrše se prilikom brojanja tog nivoa.

(2) Glasajući listići za izborne nivoe koji se trenutno ne broje pakiraju se posebno za svaki izborni nivo u providne plastične vreće, koje se odlažu na radnoj površini, tako da ih svi prisutni mogu vidjeti.

Član 44.

(Glasački listići za pojedine izborne nivoe – član 5.14 i 5.25 Izbornog zakona BiH)

(1) Glasački listići za pojedine izborne nivoe broje se sljedećim redoslijedom:

a) u Federaciji BiH:

- 1) Predsjedništvo BiH – izborni sistem – većinski glas,
- 2) Predstavnički dom Parlamentarne skupštine BiH – izborni sistem proporcionalne zastupljenosti,
- 3) Predstavnički dom Parlamenta Federacije BiH – izborni sistem proporcionalne zastupljenosti,
- 4) kantonalna skupština – izborni sistem proporcionalne zastupljenosti,

b) u Republici Srpskoj:

- 1) Predsjedništvo BiH – izborni sistem većinski glas,
- 2) Predstavnički dom Parlamentarne skupštine BiH – izborni sistem proporcionalne zastupljenosti,
- 3) predsjednik i potpredsjednici Republike Srpske – izborni sistem – većinski glas,
- 4) Narodna skupština Republike Srpske – izborni sistem proporcionalne zastupljenosti.

(2) Brojanje glasačkih listića vrši se uz prisustvo predsjednika i svih članova biračkog odbora, ili zamjenika predsjednika ili zamjenika člana biračkog odbora na biračkom mjestu gdje predsjednik ili član biračkog odbora iz opravdanih razloga ne može prisustvovati brojanju glasačkih listića. Ukoliko, na biračkom mjestu prilikom brojanja glasačkih listića iz tačke a) i tačke b) ovog stava predsjednik ili član biračkog odbora napusti biračko mjesto bez odobrenja, birački odbor je obavezan da odmah izvijesti nadležnu izbornu komisiju o toj činjenici. Izborna komisija je dužna odmah na biračko mjesto uputiti zamjenika predsjednika ili zamjenika člana biračkog odbora koji je napustio biračko mjesto, a birački odbor zaustavlja svoje brojanje glasačkih listića i ostaje na biračkom mjestu, dok na biračko mjesto ne dođe pozvani zamjenik. Prekid rada u brojanju glasačkih listića predsjednik ili zamjenik predsjednika evidentira u zapisnik o radu biračkog odbora u dio Z8.

(3) Birački odbor u Brčko distriktu BiH broji glasačke listiće prvo iz stava (1) tačka a) alineja 1) i tačke b) alineja 1), zatim glasačke listiće iz tačke a) alineja 2) i tačke b) alineja 2), zatim iz tačke b) alineja 3), nakon toga iz tačke a) alineja 3 i tačke b) alineja 4), i preostale glasačke listiće iz tačke a) alineja 4 ovog člana.

Član 45.

(Procedura brojanja glasova – za člana Predsjedništva BiH i za predsjednika i potpredsjednike Republike Srpske)

(1) Prilikom brojanja glasova dobijenih sistemom većinskog glasa predsjednik i članovi biračkog odbora:

- a) Razvrstavaju glasačke listiće za taj izborni nivo u posebne grupe po kandidatima;
- b) Prilikom razvrstavanja glasačkih listića iz tačke a) ovog stava, birački odbor na svakom glasačkom listiću provjerava da li ima važeći sigurnosni element (vodeni žig). Ukoliko birački odbor utvrdi da ima listića bez sigurnosnog elementa, proglašava ih nevažećim glasačkim listićima;
- c) Provjerava da li je na glasačkom listiću otisnut štambilj biračkog mjesta. Ukoliko birački odbor utvrdi da glasački listić ne sadrži otisak štambilja biračkog mjesta, proglašava ih nevažećim glasačkim listićima;

- d) Prave posebnu grupu listića koji nisu popunjeni (neoznačeni), kao i glasačkih listića koji su popunjeni tako da nije moguće sa sigurnošću utvrditi kojem kandidatu je birač dao svoj glas, a njihovu ispravnost utvrđuje predsjednik i članovi biračkog odbora;
- e) Ukoliko je birački odbor utvrdio glasačke listiće iz tačke b) i c) ovog stava, odmah obavještava izbornu komisiju, o čemu izborna komisija obavještava Centralnu izbornu komisiju BiH, zatim obavezno u Zapisnik o radu biračkog odbora u dio Z10 navodi podatak koliko je utvrđeno nevažećih glasačkih listića po kategorijama iz tačke d) ovog stava i broj nevažećih glasačkih listića iz tačke b) i c). Ukoliko birački odbor nije našao glasačke listiće iz stava b) i c) ovog stava, u dio Z10 Zapisnika o radu biračkog odbora ništa ne upisuje. Birački odbor u Brčko distriktu BiH za glasačke listiće iz FBiH upisuje u dio Z10a dok glasačke listiće iz RS upisuje u dio Z10b;
- f) Birački odbor glasačke listiće iz tačke b) i c) ovog stava pakira prema shemi pakiranja sa druge dvije kategorije nevažećih glasačkih listića, samo upakirane gumicom u posebnu rolu sa stikerom na roli na kom upisuju "Nevažeći glasački listići bez sigurnosnih elemenata";
- g) Broje glasačke listiće za svakog kandidata i uvezuju ih u grupe od po 25 komada;
- h) Utvrđuju ispravnost glasačkih listića iz tačke d) ovog stava – glasački listići za koje predsjednik i članovi biračkog odbora utvrde da su važeći dodaju se grupi za odgovarajućeg kandidata i
- i) utvrđuju ukupan broj važećih glasova za svakog kandidata.

(2) Nevažeći glasački listići dijele se u dvije grupe:

- a) nevažeći neoznačeni glasački listići i
- b) nevažeći ostali glasački listići.

(3) Predsjednik i članovi biračkog odbora:

- a) broje listiće svake kategorije nevažećih glasačkih listića i dobijeni broj predsjednik upisuje na Obrazac za zbirne rezultate na biračkom mjestu ZR (većinski glas) za taj izborni nivo. Pakiraju nevažeće glasačke listiće u zaštitne vreće za izborni materijal u skladu s članom 61. stav (2) i 62. stav (2) ovog Pravilnika;
- b) predsjednik upisuje rezultate brojanja glasova za svakog kandidata na Obrazac za zbirne rezultate na biračkom mjestu ZR (većinski glas) za taj izborni nivo. Ako kandidat ne dobije ijedan glas, upisuje se "0" pored imena tog kandidata i
- c) pakiraju važeće glasačke listiće u zaštitne vreće za izborni materijal, u skladu s članom 61. stav (2) i 62. stav (2) i (3) ovog Pravilnika.

(4) Predsjednik svim prisutnima objavljuje rezultate brojanja glasova na biračkom mjestu dobijene po sistemu većinskog glasa u skladu s članom 5.26 stav (2) Izbornog zakona BiH, a žutu kopiju Obrasca ZR (većinski glas) izlaže na biračkom mjestu. Predsjednik predaje zelenu kopiju sa izbornim rezultatima za taj nivo licu koje je ovlastila izborna komisija.

Član 46.

(Brojanje glasova dobijenih sistemom proporcionalne zastupljenosti za sve izborne nivoe)

(1) Po sistemu **proporcionalne zastupljenosti** vrši se glasanje i brojanje glasačkih listića za izborne nivoe kako slijedi:

a) u **Federaciji BiH:**

- 1) Predstavnički dom Parlamentarne skupštine BiH,
- 2) Predstavnički dom Parlamenta Federacije BiH,
- 3) kantonalne skupštine;

b) u Republici Srpskoj:

- 1) Predstavnički dom Parlamentarne skupštine BiH,
- 2) Narodna skupština Republike Srpske.

(2) Glasački listić je važeći ako je birač označio kvadratić:

- a) pored naziva samo jedne političke stranke, ili koalicije, ili liste nezavisnih kandidata, ili imena jednog nezavisnog kandidata;
- b) pored imena jednog ili više kandidata unutar liste samo jedne izabrane političke stranke, ili koalicije, ili liste nezavisnih kandidata i
- c) pored naziva jedne političke stranke, ili jedne koalicije, ili jedne liste nezavisnih kandidata, i kandidata (jednog ili više) unutar te odabrane političke stranke, ili koalicije ili liste nezavisnih kandidata.

Član 47.

(Utvrđivanje broja glasova za političke subjekte)

(1) Prilikom prvog brojanja glasova koji su dobijeni sistemom proporcionalne zastupljenosti utvrđuje se broj glasova koje je osvojio politički subjekt.

(2) Procedura prvog brojanja glasova je:

- a) razvrstavanje glasačkih listića, prema utvrđenom redoslijedu za određeni izborni nivo, u grupe po političkim subjektima – u grupu za jedan politički subjekt ulaze glasački listići koje je birač označio na način propisan u članu 48. stav (2) ovog pravilnika;
- b) prilikom razvrstavanja glasačkih listića iz tačke a) ovog stava, birački odbor na svakom glasačkom listiću provjerava da li ima važeći sigurnosni element (vodeni žig). Ukoliko birački odbor utvrdi da ima listića bez sigurnosnog elementa, proglašava ih nevažećim glasačkim listićima;
- c) pravljenje posebnih grupa neoznačenih, kao i glasačkih listića koji su ispunjeni tako da nije moguće sa sigurnošću utvrditi kojem političkom subjektu je birač dao svoj glas – njihovu ispravnost utvrđuju predsjednik i članovi biračkog odbora;
- d) ukoliko je birački odbor utvrdio glasačke listiće iz tačke b) i c) ovog stava, obavezno u Zapisnik o radu biračkog odbora u dio Z10 navodi podatak koliko je utvrđeno nevažećih glasačkih listića po kategorijama iz tačke d) ovog stava i broj nevažećih glasačkih listića iz tačke b) i c). Ukoliko birački odbor nije našao glasačke listiće i stava b) i c) ovog stava u dio Z10 Zapisnika o radu biračkog odbora ništa ne upisuje. Birački odbor u Brčko distriktu BiH za glasačke listiće iz FBiH upisuje u dio Z10a dok glasačke listiće iz RS upisuje u dio Z10b;
- e) Birački odbor glasačke listiće iz tačke b) i c) ovog stava pakira prema shemi pakiranja sa druge dvije kategorije nevažećih glasačkih listića, samo upakirane gumicom u posebnu rolu sa stikerom na roli na kom upisuju "Nevažeći glasački listići bez sigurnosnih elemenata.

- f) duplo brojanje glasačkih listića koji se slažu u grupe od po 25 komada i njihovo uvezivanje elastičnom gumicom za svakog političkog subjekta i
- g) utvrđivanje broja glasova za svaki politički subjekt.

(3) Predsjednik i članovi biračkog odbora provjeravaju glasačke listiće iz stava (2) tačka b) ovog člana. Glasački listići za koje predsjednik i članovi biračkog odbora utvrde da su važeći dodaju se grupi za politički subjekt.

(4) Preostali nevažeći glasački listići koji se dijele u dvije grupe:

- a) nevažeći neoznačeni glasački listići i
- b) nevažeći ostali glasački listići

broje se i utvrđuje se njihov broj.

(5) Predsjednik biračkog odbora u Obrazac za zbirne rezultate na biračkom mjestu ZR (proporcionalna zastupljenost) za taj izborni nivo upisuje podatke utvrđene u stavu (2) tačka e) i stavu (4) ovog člana.

(6) Predsjednik svim prisutnima objavljuje rezultate prvog brojanja glasova dobijenih po sistemu proporcionalne zastupljenosti i dostavlja izornoj komisiji rezultate brojanja na biračkom mjestu dobijene nakon prvog brojanja po sistemu proporcionalne zastupljenosti na način koji odredi izborna komisija.

Član 48.

(Utvrđivanje broja glasova po kandidatima unutar političkih subjekata)

(1) Prilikom drugog brojanja utvrđuje se broj glasova za svakog kandidata unutar liste političke stranke, koalicije ili liste nezavisnih kandidata.

(2) Drugo brojanje glasova za kandidate svih političkih stranaka, koalicija ili listi nezavisnih kandidata obavlja se posebno. Postupak se provodi iščitavanjem rednih brojeva kandidata i evidentiranjem uspravnim crticama u pomoćnom obrascu za drugi krug brojanja glasova po kandidatima.

(3) Izuzetno od procedure iz stava (2) ovog člana na biračkom mjestu sa tri člana biračkog odbora, predsjednik biračkog odbora čita redni broj kandidata ispred kojih su birači u okviru tog političkog subjekta stavljali oznaku, a dva člana biračkog odbora svaki za sebe u svoj Pomoćni obrazac za drugi krug brojanja glasova po kandidatima upisuje uspravne crtice.

(4) Predsjednik i članovi biračkog odbora pakiraju glasačke listiće u zaštitne vreće za izborni materijal u skladu s članom 61. stav (3), (4) i (5) i 62. stav (4) i (5) ovog Pravilnika.

(5) Prvo i drugo brojanje glasova koji su dobijeni sistemom proporcionalne zastupljenosti ponavljaju se za svaki izborni nivo koristeći Pomoćni obrazac za brojanje i Obrazac za zbirne rezultate na biračkom mjestu ZR (proporcionalna zastupljenost) za taj izborni nivo na način utvrđen ovim članom.

Član 49.
(Dostava izbornog materijala s biračkih mjesta izbornoj komisiji)

(1) Birački odbor odmah, a najkasnije 12 sati nakon zatvaranja biračkog mjesta, dostavlja nadležnoj izbornoj komisiji:

- a) Zapisnik o radu biračkog odbora i
- b) kopije obrazaca i ostali izborni materijal iz člana 61. i 62. ovog Pravilnika.

(2) Kopije obrazaca o rezultatima glasanja za sve izborne nivoe za ovo biračko mjesto zadržava predsjednik biračkog odbora.

(3) Prepis zapisnika o radu biračkog odbora akreditiranom posmatraču će se omogućiti na pogodan način što podrazumijeva i slikanje putem mobilnog aparata.

Odjeljak B. Biračka mjesta za glasanje u odsustvu – član 5.22 stav (1) i 5.24 Izbornog zakona BiH

Član 50.
(Brojanje koverti sa glasačkim listićima)

(1) Nakon zatvaranja biračkog mjesta, predsjednik i članovi biračkog odbora biračkog mjesta za glasanje u odsustvu broje kovertu s glasačkim listićima.

(2) Kovertu s glasačkim listićima s biračkih mjesta za glasanje u odsustvu otvaraju se i broje se glasački listići u Glavnom centru za brojanje.

(3) Kovertu s nepotvrđenim-kovertiranim glasačkim listićima (ako određeno biračko mjesto za glasanje u odsustvu izdaje nepotvrđene-kovertirane glasačke listiće) predsjednik i članovi biračkog odbora dostavljaju na verifikaciju Glavnom centru za brojanje i ako biračko pravo za datog birača bude potvrđeno, ovi glasački listići broje se u Glavnom centru za brojanje.

(4) Predsjednik i članovi biračkog odbora:

- a) nakon popune Obrasca za brojno stanje za biračko mjesto za glasanje u odsustvu otvaraju glasačku kutiju i stavljaju sadržaj na sto tako da to vide svi prisutni;
- b) razvrstavaju kovertu s glasačkim listićima na:
 - 1) kovertu s nepotvrđenim glasačkim listićima (za ona biračka mjesta u odsustvu koja izdaju nepotvrđene glasačke listiće) i
 - 2) kovertu s glasačkim listićima za glasanje u odsustvu;
- c) razvrstavaju kovertu s glasačkim listićima za glasanje u odsustvu po osnovnim izbornim jedinicama za koje su birači glasali, odnosno po oznakama kombinacija glasačkih listića na kovertama;
- d) broje kovertu s nepotvrđenim glasačkim listićima, kontroliraju brojanje, a dobijeni broj predsjednik upisuje u Obrazac za brojno stanje za glasanje nepotvrđenim glasačkim listićima;
- e) broje kovertu s glasačkim listićima za glasanje u odsustvu, kontroliraju brojanje, a dobijeni broj koverti po osnovnim izbornim jedinicama za koje su birači glasali, predsjednik upisuje u Obrazac za brojno stanje za glasanje u odsustvu;

- f) vežu zajedno kovertu za glasanje u odsustvu s istim kombinacijama glasačkih listića po osnovnim izbornim jedinicama i pakiraju ih u odgovarajuću zaštitnu vreću za pakiranje izbornog materijala u odsustvu, u skladu s članom 63. ovog pravilnika;
- g) pakiraju kovertu s nepotvrđenim-kovertiranim glasačkim listićima u odgovarajuću zaštitnu vreću za pakiranje izbornog materijala, u skladu s članom 64. ovog Pravilnika i
- h) popunjavaju i potpisuju Obrazac za brojno stanje za biračka mjesta za glasanje u odsustvu
 - a. i Obrazac za brojno stanje za biračka mjesta koja izdaju nepotvrđene glasačke listiće.

Odjeljak C. Mobilni timovi – član 5.21 stav (2) Izbornog zakona BiH

Član 51.

(Brojanje koverti s glasačkim listićima mobilnih timova)

(1) Nakon što posjete sve birače koji glasaju putem mobilnog tima predsjednik i članovi mobilnog tima u sjedištu izborne komisije broje kovertu s glasačkim listićima na sljedeći način:

- a) broje i upisuju ukupan broj preostalih neiskorištenih koverti s glasačkim listićima za svaki izborni nivo u Obrazac za brojno stanje za glasanje putem mobilnog tima;
- b) pakiraju neiskorištene kovertu s glasačkim listićima u vreću utvrđenu u članu 58. stav (1) tačka b) ovog pravilnika;
- c) broje i upisuju u Obrazac za brojno stanje ukupan broj potpisa glasača iz člana 24. stav (1) tačka a) ovog pravilnika;
- d) broje i upisuju ukupan broj koverti oštećenih glasačkih listića i pakiraju ih u odgovarajuću kovertu;
- e) nakon upisa prethodno utvrđenih podataka u Obrazac za brojno stanje mobilnog tima otvaraju glasačku kutiju i stavljaju sadržaj na sto tako da to vide svi prisutni;
- f) razvrstavaju kovertu s glasačkim listićima za glasanje putem mobilnog tima po osnovnim izbornim jedinicama za koje su birači glasali, odnosno po oznakama kombinacija glasačkih listića na kovertama;
- g) broje kovertu s glasačkim listićima za glasanje putem mobilnog tima, što znači da se kontroliraju i broje kovertu a ne glasački listići, a dobijeni broj koverti po osnovnim izbornim jedinicama za koje su birači glasali predsjednik upisuje u Obrazac za brojno stanje za glasanje putem mobilnog tima;
- h) vežu zajedno kovertu s glasačkim listićima i pakiraju ih u odgovarajuću zaštitnu vreću za pakiranje izbornog materijala mobilnog tima, u skladu s članom 65. ovog pravilnika i
- i) popunjavaju i potpisuju Obrazac za brojno stanje za mobilne timove.

(2) Originalni Obrazac brojnog stanja, Zapisnik, Obrazac brojnog stanja za glasanje putem mobilnog tima i upakirani izborni materijal mobilni tim dostavlja izornoj komisiji.

Član 52.

(Akreditirani posmatrači)

Birački odbor mora omogućiti akreditiranim posmatračima nesmetano promatranje cijelog procesa glasanja i prebrojavanja glasačkih listića i upisa svih primjedbi u Zapisnik o radu biračkog odbora.

Odjeljak D. Biračka mjesta za glasanje u DKP BiH

Član 53. (Brojanje koverti s glasačkim listićima DKP BiH)

Brojanje koverti sa glasačkim listićima na biračkim mjestima u DKP BiH se vrši po proceduri utvrđenoj u Odjeljku B. ovog Poglavlja.

Član 54. (Povrat izbornog materijala)

Originalni Obrazac brojnog stanja, Zapisnik i upakirani izborni materijal birački odbor u DKP BiH, putem Ministarstva vanjskih poslova BiH, dostavlja Centralnoj izbornoj komisiji BiH, najkasnije 5 dana od dana održavanja izbora.

Odjeljak E. Brojanje glasova u Glavnom centru za brojanje

Član 55. (Pripreme aktivnosti za brojanje glasačkih listića)

- (1) Grupa za brojanje glasačkih listića organizirana je kao određeni broj timova brojača. Jedan tim brojača okupljen je oko jednog stola. Osim osoblja koje čine brojači, svaki od timova ima po jednog vođu tima.
- (2) U prostoru grupe za brojanje glasačkih listića, nadzornik ove grupe prima kutije sa sortiranim serijama glasačkih listića i raspodjeljuje ih po timovima za brojanje. Zajedno sa serijama glasačkih listića, nadzornik grupe za brojanje glasačkih listića zadužuje timove brojača kompletima obrazaca za rezultate brojanja glasova u Glavnom centru za brojanje.
- (3) U zavisnosti od tipa glasačkih listića koji se nalaze u određenoj seriji, a koji odgovaraju određenoj kombinaciji glasačkih listića, nadzornik grupe priprema odgovarajući set obrazaca za zbirne rezultate brojanja glasova i dostavlja ih timu brojača.

Član 56. (Organizacija procesa brojanja)

- (1) Proces brojanja i struktura timova za brojanje u Centru za brojanje organizirani su na način identičan strukturi članova jednog biračkog odbora na redovnim biračkim mjestima. Jedan tim sa brojačima zadužen je za brojanje jedne kutije sa određenom serijom i broji u pravilu sve tipove listića koje serija sadrži.
- (2) Timovi za brojanje u narednim fazama mogu brojati i glasačke listiće sa redovnih biračkih mjesta, za potrebe kontrole izbornih rezultata sa biračkih mjesta. Centralna izborna komisija BiH o tome donosi posebnu odluku.
- (3) Redoslijed aktivnosti u okviru procesa brojanja podrazumijeva kontrolno brojanje glasačkih listića za sve sortirane grupe listića unutar jedne serije, jednog brojanja glasova za glasanje po sistemu većinskog glasa i prvog i drugog brojanja za glasanje po sistemu otvorenih lista.

Član 57.
(Kontrolno brojanje glasačkih listića)

(1) Tim brojača, zajedno sa vođom tima, nakon prijema kutije u kojoj se nalazi sadržaj jedne serije, postupa na sljedeći način:

- a) otvara jednu vreću sa grupom listića za jedan izborni nivo i isprazne je na prazan sto za brojanje,
- b) poreda svežnjeve od po 25 sortiranih glasačkih listića jedan na drugi,
- c) prebrojava svežnjeve od po 25 glasačkih listića i provjeraju slaganje dobijenog broja sa podacima iz obrasca za praćenje i kontrolu kretanja serije koje upišu timovi pripreme brojanja,
- d) upisiva ukupan broj glasačkih listića iz vreće sa sortiranom grupom listića, na odgovarajuće obrasce za zbirne rezultate u Glavnom centru za brojanje,
- e) podatak o ukupnom broju glasačkih listića upisuje i u obrazac za praćenje kretanja serije, kao i u obrazac za zbirne rezultate brojanja u Glavnom centru za brojanje i kontroliraju tačnost upisanih brojeva i
- f) ponavlja prethodne korake za sve preostale tipove listića iz jedne serije za ostale izborne nivoe.

(2) Po završetku ispunjavanja obrazaca sve glasačke listiće koji nisu potrebni za sljedeći proces brojanja pakiraju, posebno za svaki izborni nivo, u providne plastične vreće koje se odlažu tako da ih mogu vidjeti svi prisutni.

Član 58.
(Postupak brojanja)

Brojanje glasačkih listića u Glavnom centru za brojanje vrši se po proceduri utvrđenoj u članu 46, 47, 48. i 49. ovog pravilnika.

Član 59.
(Kompletiranje dokumentacije sa rezultatima brojanja i unos rezultata)

(1) Nakon završetka faze brojanja, svi originalni obrasci za zbirne rezultate u Glavnom centru za brojanje glasova koji su se brojali, šalju se na unos rezultati brojanja glasova sa ovih obrazaca i vrši njihova konsolidacija i objedinjavanje.

(2) Nadzornik grupe za brojanje glasačkih listića prikuplja sve originalne obrasce za zbirne rezultate iz jedne serije koja je prebrojana i predaje ih nadzorniku kontrole rezultata.

(3) Kopije obrazaca iz stava (2) pakiraju se u vreće sa prebrojanim glasovima za određeni nivo koje se pečate (plava kopija).

(4) Kopije obrazaca iz stava (3) ovog člana na zahtjev posmatrača daju im se na uvid (žuta kopija).

Član 60.
(Obrada izbornih rezultata)

- (1) Odjel za prijem, kontrolu, unos i utvrđivanje izbornih rezultata, putem posebne Aplikacije za unos izbornih rezultata, unosi sve neophodne podatke o rezultatima glasanja sa obrazaca u bazu podataka za kontrolu i obradu izbornih rezultata koja je posebno urađena za ovu namjenu.
- (2) Odjel za prijem, kontrolu, unos i utvrđivanje izbornih rezultata, u skladu sa stavom (1) ovog člana, vrši dva unosa, od kojih je drugi unos kontrolni.
- (3) Unosi podataka iz stava (2) ovog člana se usklađuju, što je osnova za kontrolu izbornih rezultata.
- (4) Obrada izbornog materijala i unos podataka u Glavnom centru za brojanje vrši se po prispjeću izbornog materijala koji dostavljaju izborne komisije prema redoslijedu dostavljanja, kao i redoslijedu obrade u Glavnom centru za brojanje.

POGLAVLJE V. PAKIRANJE IZBORNOG MATERIJALA

Član 61.
(Redovna biračka mjesta FBiH – član 5.26 Izbornog zakona BiH)

- (1) Na redovnim biračkim mjestima u Federaciji BiH izborni materijal pakira birački odbor na način utvrđen odredbama ovog člana.
- (2) Glasački listići za Predsjedništvo BiH pakiraju se u **SIVE ZAŠTITNE VREĆE** tako što se u njih stavljaју:
 - a) prebrojani važeći glasački listići i nevažeći glasački listići,
 - b) providna plastična vreća s kovertom s Obrascem za zbirne rezultate ZR (većinski glas) – plava kopija.
- (3) Glasački listići za Predstavnički dom Parlamentarne skupštine BiH pakiraju se u **PLAVE ZAŠTITNE VREĆE** tako što se u njih stavljaју:
 - a) prebrojani važeći glasački listići i nevažeći glasački listići,
 - b) providna plastična vreća s kovertom s Obrascem za zbirne rezultate ZR (proporcionalna zastupljenost) – plava kopija.
 - c) Komplet pomoćnih obrazaca za bojanje glasova po kandidatima
- (4) Glasački listići za Predstavnički dom Parlamenta FBiH pakiraju se u **LJUBIČASTE ZAŠTITNE VREĆE** tako što se u njih stavljaју:
 - a) prebrojani važeći glasački listići i nevažeći glasački listići,
 - b) providna plastična vreća s kovertom s Obrascem za zbirne rezultate ZR (proporcionalna zastupljenost) – plava kopija.
 - c) Komplet pomoćnih obrazaca za bojanje glasova po kandidatima

(5) Glasački listići za kantonalne skupštine pakiraju se u **BORDO CRVENE ZAŠTITNE VREĆE** tako što se u njih stavljaју:

- a) prebrojani važeći glasački listići i nevažeći glasački listići,
- b) providna plastična vreća s kovertom s Obrascem za zbirne rezultate ZR (proporcionalna zastupljenost) – plava kopija.
- c) Komplet pomoćnih obrazaca za bojanje glasova po kandidatima

(6) Neiskorišteni i oštećeni glasački listići za Predsjedništvo BiH, Predstavnički dom Parlamentarne skupštine BiH, Predstavnički dom FBiH, kantonalne skupštine pakiraju se u **PROVIDNE VEĆE ZAŠTITNE VREĆE za svaki nivo** po jedna tako što se u njih stavljaју:

- a) neiskorišteni glasački listići (upakirani u originalne kutije) i
- b) koverta upropašteni glasački listići.

(7) U **PROVIDNE MANJE ZAŠTITNE VREĆE** pakiraju se:

- a) Zapisnik o radu biračkog odbora ZARBO– original u koricama i
- b) Koverta sa izvodom iz Centralnog biračkog spiska za redovne birače i folija sa PDL obrascima.

(8) Kopije obrazaca koje je birački odbor koristio tokom glasanja i brojanja glasačkih listića na biračkom mjestu birački odbor pakira na sljedeći način:

- a) u kovertu za predsjednika biračkog odbora stavljaју se:
 - 1) Obrazac za brojno stanje BS – crvena kopija,
 - 2) Obrazac za zbirne rezultate ZR (većinski glas) – crvena kopija,
 - 3) Obrazac za zbirne rezultate ZR (proporcionalna zastupljenost) – crvena kopija;
- b) u kovertu za predsjednika izborne komisije stavljaју se:
 - 1) Obrazac za brojno stanje BS – zelena kopija,
 - 2) Obrazac za zbirne rezultate ZR (većinski glas) – zelena kopija,
 - 3) Obrazac za zbirne rezultate ZR (proporcionalna zastupljenost) – zelena kopija i
 - 4) Zapisnik o radu biračkog odbora ZARBO – zelena kopija.

(9) Original obrasce koje je birački odbor koristio tokom glasanja i brojanja glasačkih listića na biračkom mjestu birački odbor pakira na sljedeći način:

- a) u kovertu A3 za Centralnu izbornu komisiju BiH stavljaју se:
 - 1) Obrazac za brojno stanje BS – original u koricama,
 - 2) Obrazac za zbirne rezultate ZR (većinski glas) – original u koricama i
 - 3) Obrazac za zbirne rezultate ZR (proporcionalna zastupljenost) – original u koricama.

(10) Birački odbor svaku od navedenih vreća označava crnim markerom (naprimjer: broj biračkog mjesta 133A025) na dva mjesta na zaštitnoj vreći. Svaka vreća mora biti čvrsto zalijepljena ljepljivom trakom ispod mjesta gdje se kroz predviđene otvore na vreći provlači plastični pečat čiji se broj upisuje u odgovarajućem obrascu na predviđenom mjestu).

(11) Birački odbor u osnovnoj izbornoj jedinici Brčko distrikt BiH izborni materijal, za nivoe vlasti u Federaciji BiH pakira na način utvrđen u stavu (2), (3), (4), (6), (7), (8), (9) i (10) ovog člana.

(12) Izborna komisija je, po preuzimanju izbornog materijala od biračkog odbora, obavezna u dostavljene registratore i U-folije pakirati izborni materijal na način:

- a) da u jednu U-foliju pakira Obrazac za brojno stanje, obrasce Evidencija glasačkih listića za sve nivoe vlasti i obrazac Primopredaja izbornog materijala BO;
- b) da u jednu U-foliju pakira Obrazac za zbirne rezultate ZR – većinski glas;
- c) da posebno u U-folije pakira Obrasce za zbirne rezultate ZR – proporcionalna zastupljenost.

Tako formirane U-folije pakira u registratore na način da materijal iz tačke a) pakira u jedan registrator, materijal iz tačke b) pakira u poseban registrator i materijal iz tačke c) pakira u tri posebna registratora, na kojima mora biti ispisano: kod i naziv općine, naziv materijala ili kod nivoa čiji su obrasci u registratoru, početni i krajnji broj biračkog mjesta, čije su U-folije stavljene u taj registrator i redni broj registratora (naprimjer: 133A, Novi Grad Sarajevo, BS, 001-160, 1-1; 133A, Novi Grad Sarajevo, 701/702, 001-160, 1-1; 133A, Novi Grad Sarajevo, 513, 001-050, 1-3; 133A, Novi Grad Sarajevo, 407, 001-040, 1-4 i 133A, Novi Grad Sarajevo, 209, 001-030, 1-6).

(13) Obrasci iz stava (12) tačka a), b) i c) ovog člana, u U-folijama se pakiraju na način da se presaviju tako da se kroz U-foliju jasno vidi broj biračkog mjesta, ukoliko birački odbor nije napisao broj biračkog mjesta izborna komisija je prilikom pakiranja obavezna u predviđenu rubriku upisati broj biračkog mjesta.

(14) Birački odbor pakira štambilj u PLD vrećicu i na vrećici obavezno crnim markerom upisuje broj biračkog mjesta. Ovako upakovan štambilj dostavlja se Predsjedniku izborne komisije.

Član 62.

(Redovna biračka mjesta RS)

(1) Na redovnim biračkim mjestima u Republici Srpskoj izborni materijal pakira birački odbor na način utvrđen odredbama ovog člana.

(2) Glasački listići za Predsjedništvo BiH pakiraju se u **SIVE ZAŠTITNE VREĆE** tako što se u njih stavljaju:

- a) prebrojani važeći glasački listići i nevažeći glasački listići,
- b) providna plastična vreća s kovertom s Obrascem za zbirne rezultate ZR (većinski glas) – plava kopija.

(3) Glasački listići za predsjednika i potpredsjednike Republike Srpske pakiraju se u **ŽUTE ZAŠTITNE VREĆE** tako što se u njih stavljaju:

- a) prebrojani važeći glasački listići i nevažeći glasački listići,
- b) providna plastična vreća s kovertom s Obrascem za zbirne rezultate ZR (većinski glas) – plava kopija.

(4) Glasački listići za Predstavnički dom Parlamentarne skupštine BiH pakiraju se u **PLAVE ZAŠTITNE VREĆE** tako što se u njih stavljaju:

- a) prebrojani važeći glasački listići i nevažeći glasački listići,

- b) providna plastična vreća s kovertom s Obrascem za zbirne rezultate ZR (proporcionalna zastupljenost) – plava kopija.
- c) Komplet pomoćnih obrazaca za bojanje glasova po kandidatima.

(5) Glasački listići za Narodnu skupštinu Republike Srpske pakiraju se u **SMEĐE ZAŠTITNE VREĆE** tako što se u njih stavljaju:

- a) prebrojani važeći glasački listići i nevažeći glasački listići,
- b) providna plastična vreća s kovertom s Obrascem za zbirne rezultate ZR (proporcionalna zastupljenost) – plava kopija.
- c) Komplet pomoćnih obrazaca za bojanje glasova po kandidatima

(6) Neiskorišteni i oštećeni glasački listići za Predsjedništvo BiH, Predstavnički dom Parlamentarne skupštine BiH, Narodnu skupštinu RS pakiraju se u **PROVIDNE VEĆE ZAŠTITNE VREĆE** po jedna tako što se u njih stavljaju:

- a) neiskorišteni glasački listići (upakirani u originalne kutije) i
- b) koverta upropašteni glasački listići.

(7) U **PROVIDNE MANJE ZAŠTITNE VREĆE** pakiraju se:

- a) Zapisnik o radu biračkog odbora ZARBO – original u koricama i
- b) Koverta sa izvodom iz konačnog Centralnog biračkog spiska za redovne birače i folija sa PDL obrascima.

(8) Kopije obrazaca koje je birački odbor koristio tokom glasanja i brojanja glasačkih listića na biračkom mjestu birački odbor pakiraju na sljedeći način:

- a) u kovertu za predsjednika biračkog odbora stavljaju se:
 - 1) Obrazac za brojno stanje BS – crvena kopija,
 - 2) Obrazac za zbirne rezultate ZR (većinski glas) – crvena kopija i
 - 3) Obrazac za zbirne rezultate ZR (proporcionalna zastupljenost) – crvena kopija;
- b) u kovertu za predsjednika izborne komisije stavljaju se:
 - 1) Obrazac za brojno stanje BS – zelena kopija,
 - 2) Obrazac za zbirne rezultate ZR (većinski glas) – zelena kopija i
 - 3) Obrazac za zbirne rezultate ZR (proporcionalna zastupljenost) – zelena kopija.

(9) Original obrasce, koje je birački odbor koristio tokom glasanja i brojanja glasačkih listića na biračkom mjestu, birački odbor pakira na sljedeći način:

- a) u kovertu A3 za Centralnu izbornu komisiju BiH stavljaju se:
 - 1) Obrazac za brojno stanje BS – original u koricama,
 - 2) Obrazac za zbirne rezultate ZR (većinski glas) – original u koricama i
 - 3) Obrazac za zbirne rezultate ZR (proporcionalna zastupljenost) – original u koricama.

(10) Birački odbor svaku od navedenih vreća označava crnim markerom (naprimjer: broj biračkog mjesta 146B012 na dva mjesta na zaštitnoj vreći). Svaka vreća mora biti čvrsto zalijepljena

ljepljivom trakom ispod mjesta gdje se kroz predviđene otvore na vreći provlači plastični pečat čiji se broj upisuje u odgovarajućem obrascu na predviđenom mjestu.

(11) Birački odbor u osnovnoj izbornoj jedinici Brčko distrikt BiH izborni materijal, za nivoe vlasti u Republici Srpskoj pakira na način utvrđen u stavu (2), (3), (4), (5), (6), (7), (8), (9) i 10 ovog člana.

(12) Izborna komisija je, po preuzimanju izbornog materijala od biračkog odbora, obavezna u dostavljene registratore i U-folije pakovati izborni materijal na način:

- a) da u jednu U-foliju pakira Obrazac za brojno stanje, obrasce Evidencija glasačkih listića za sve nivoe vlasti i obrazac Primopredaja izbornog materijala BO;
- b) da posebno u U-folije pakira Obrasce za zbirne rezultate ZR – većinski glas;
- c) da posebno u U-folije pakira Obrasce za zbirne rezultate ZR – proporcionalna zastupljenost.

Tako formirane U-folije pakira u registratore na način da materijal iz tačke a) pakira u jedan registrator, materijal iz tačke b) pakira u dva posebna registratora i materijal iz tačke c) pakira u dva posebna registratora, na kojima mora biti ispisano: kod i naziv općine, naziv materijala ili kod nivoa čiji su obrasci u registratoru, početni i krajnji broj biračkog mjesta, čije su U-folije stavljene u taj registrator i redni broj registratora (naprimjer: 146B, Rogatica, BS, 001-024, 1-1; 146B, Rogatica, 703, 001-024, 1-1; 146B, Rogatica, 523, 001-024, 1-1; 146B, Rogatica, 600, 001-024, 1-1 i 146B, Rogatica, 308, 001-024, 1-1).

(13) Obrasci iz stava (12) tačka a), b) i c) ovog člana, u U-folijama se pakiraju na način da se presaviju tako da se kroz U-foliju jasno vidi broj biračkog mjesta, ukoliko birački odbor nije napisao broj biračkog mjesta izborna komisija je prilikom pakiranja obavezna u predviđenu rubriku upisati broj biračkog mjesta.

(14) Birački odbor pakira štambilj u PLD vrećicu i na vrećici obavezno crnim markerom upisuje broj biračkog mjesta. Ovako upakovan štambilj dostavlja se Predsjedniku izborne komisije.

Član 63.

(Biračka mjesta za glasanje u odsustvu)

(1) Na biračkim mjestima za glasanje u odsustvu birački odbori pakira izborni materijal na sljedeći način:

- a) u **CRVENU ZAŠTITNU VREĆU** stavljaju se:
 - 1) prebrojane koverta sa setovima glasačkih listića uvezane po osnovnim izbornim jedinicama i
 - 2) plava kopija Obrasca za brojno stanje BSO;
- b) u **PROVIDNU VEĆU ZAŠTITNU VREĆU** stavljaju se:
 - 1) neiskorištene koverta sa setovima glasačkih listića upakirane u originalne kutije i
 - 2) oštećene koverta sa setovima glasačkih listića i
- c) u **PROVIDNU MANJU ZAŠTITNU VREĆU** stavljaju se:
 - 1) Obrazac za brojno stanje BSO (original u koricama),
 - 2) Zapisnik (original u koricama) i
 - 3) izvod iz konačnog Centralnog biračkog spiska za birače koji imaju status raseljenog lica

4) PDL obrasci.

(2) Kopije obrazaca koje je birački odbor koristio tokom glasanja i brojanja koverti s glasačkim listićima na biračkom mjestu birački odbor pakira na sljedeći način:

- a) u kovertu za predsjednika biračkog odbora stavlja se Obrazac za brojno stanje BSO (crvena kopija) i
- b) u kovertu za predsjednika izborne komisije stavlja se Obrazac za brojno stanje BSO (zeleni kopija), i Zapisnik o radu biračkog odbora (zeleni kopija).

(3) Birački odbor svaku od navedenih vreća označava crnim markerom (naprimjer: broj biračkog mjesta 146B012 na dva mjesta na zaštitnoj vreći). Svaka vreća mora biti čvrsto zalijepljena ljepljivom trakom ispod mjesta gdje se kroz predviđene otvore na vreći provlači plastični pečat čiji se broj upisuje u odgovarajućem obrascu na predviđenom mjestu.

(4) Birački odbor pakira štambilj u PLD vrećicu i na vrećici obavezno crnim markerom upisuje broj biračkog mjesta. Ovako upakovan štambilj dostavlja se Predsjedniku izborne komisije.

Član 64.

(Biračko mjesto za izdavanje nepotvrđenih-kovertiranih glasačkih listića)

(1) Na biračkim mjestima ovlaštenim za izdavanje nepotvrđenih-kovertiranih glasačkih listića u Federaciji BiH i Republici Srpskoj i Brčko distrikt BiH birački odbori pakiraju izborni materijal na sljedeći način:

- a) u **ZELENU ZAŠTITNU VREĆU** stavlja se:
 - 1) prebrojane koverti s nepotvrđenim glasačkim listićima i
 - 2) plava kopija Obrasca za brojno stanje BSN;
- b) u **PROVIDNU VEĆU ZAŠTITNU VREĆU** stavlja se:
 - 1) neiskorištene koverti sa setovima glasačkih listića upakirane u originalne kutije i
 - 2) oštećene koverti sa setovima glasačkih listića i
- c) u **PROVIDNU MANJU ZAŠTITNU VREĆU** stavlja se:
 - 1) Obrazac za brojno stanje BSN (original u koricama),
 - 2) Zapisnik (original u koricama) i
 - 3) spisak birača koji imaju pravo glasati nepotvrđenim glasačkim listićima.

(2) Kopije obrazaca koje je birački odbor koristio tokom glasanja i brojanja koverti s nepotvrđenim glasačkim listićima na biračkom mjestu birački odbor pakira na sljedeći način:

- a) u kovertu za predsjednika biračkog odbora stavlja se Obrazac za brojno stanje BSN (crvena kopija),
- b) u kovertu za predsjednika izborne komisije stavlja se Obrazac za brojno stanje BSN (zeleni kopija), Zapisnik o radu biračkog odbora (zeleni kopija),
- c) izvod iz konačnog Centralnog biračkog spiska i
- d) PDL obrasci.

(3) Birački odbor svaku od navedenih vreća označava crnim markerom (naprimjer: broj biračkog mjesta 146BNNN na dva mjesta na zaštitnoj vreći). Svaka vreća mora biti čvrsto zalijepljena ljepljivom trakom ispod mjesta gdje se kroz predviđene otvore na vreći provlači plastični pečat čiji se broj upisuje u odgovarajućem obrascu na predviđenom mjestu.

(4) Birački odbor pakira štambilj u PLD vrećicu i na vrećici obavezno crnim markerom upisuje broj biračkog mjesta. Ovako upakovan štambilj dostavlja se Predsjedniku izborne komisije.

Član 65. (Mobilni tim)

(1) Mobilni tim pakira izborni materijal na sljedeći način:

a) u **NARANDŽASTU ZAŠTITNU VREĆU** stavljaju se:

- 1) prebrojane koverta sa setovima glasačkih listića uvezane po osnovnim izbornim jedinicama i
- 2) plava kopija Obrasca za brojno stanje BSM;

b) u **PROVIDNU VEĆU ZAŠTITNU VREĆU** stavljaju se:

- 1) neiskorištene koverta sa setovima glasačkih listića upakirane u originalne kutije i
- 2) oštećene koverta sa setovima glasačkih listića i

c) u **PROVIDNU MANJU ZAŠTITNU VREĆU** stavljaju se:

- 1) Obrazac za brojno stanje BSM (original u koricama),
- 2) Zapisnik (original u koricama),
- 3) izvod iz konačnog Centralnog biračkog spiska (za birače koji su vezani za svoje domove zbog starosti, bolesti ili invaliditeta i birače koji su zatvorenici ili su vezani za ustanove, a imaju pravo glasati) i
- 4) PDL obrasci.

(2) Kopije obrazaca koje je birački odbor koristio tokom glasanja i brojanja koverti s glasačkim listićima na biračkom mjestu birački odbor pakira na sljedeći način:

- a) u kovertu za predsjednika biračkog odbora stavlja se Obrazac za brojno stanje BSM (crvena kopija) i
- b) u kovertu za predsjednika izborne komisije stavlja se Obrazac za brojno stanje BSM (zelena kopija) i Zapisnik o radu biračkog odbora (zelena kopija).

(3) Birački odbor svaku od navedenih vreća označava crnim markerom (naprimjer: broj mobilnog tima 146BMT1 na dva mjesta na zaštitnoj vreći). Svaka vreća mora biti čvrsto zalijepljena ljepljivom trakom ispod mjesta gdje se kroz predviđene otvore na vreći provlači plastični pečat čiji se broj upisuje u odgovarajućem obrascu na predviđenom mjestu.

(4) Birački odbor pakira štambilj u PLD vrećicu i na vrećici obavezno crnim markerom upisuje broj mobilnog tima. Ovako upakovan štambilj dostavlja se Predsjedniku izborne komisije.

Član 66.
(Biračko mjesto u DKP BiH)

(1) Na biračkim mjestima u DKP BiH birački odbori pakuje izborni materijal na sljedeći način:

- a) u **CRVENU ZAŠTITNU VREĆU** stavljaju se:
 - 1) prebrojane koverta sa setovima glasačkih listića uvezane po osnovnim izbornim jedinicama i
 - 2) plava kopija Obrasca za brojno stanje BSO;
- b) u **PROVIDNU VEĆU ZAŠTITNU VREĆU** stavljaju se:
 - 1) neiskorištene koverta sa setovima glasačkih listića upakovane u originalne kutije i
 - 2) oštećene koverta sa setovima glasačkih listića i
- c) u **PROVIDNU MANJU ZAŠTITNU VREĆU** stavljaju se:
 - 1) Obrazac za brojno stanje BSO (original u koricama),
 - 2) Zapisnik (original u koricama) i
 - 3) izvod iz konačnog Centralnog biračkog spiska za birače koji imaju status raseljenog lica i PDL obrazac (ako se koristio)
 - 4) PLD vrećica (Štambilj za ovjeru glasačkih listića)

(2) Kopije obrazaca koje je birački odbor koristio tokom glasanja i brojanja koverti s glasačkim listićima na biračkom mjestu birački odbor pakuje na sljedeći način:

- a) u kovertu za predsjednika biračkog odbora stavlja se Obrazac za brojno stanje BSO (crvena kopija)

(3) Birački odbor svaku od navedenih vreća označava crnim markerom (naprimjer: broj biračkog mjesta A01 na dva mjesta na zaštitnoj vreći). Svaka vreća mora biti čvrsto zalijepljena ljepljivom trakom ispod mjesta gdje se kroz predviđene otvore na vreći provlači plastični pečat čiji se broj upisuje u odgovarajućem obrascu na predviđenom mjestu.

(4) Birački odbor pakuje štambilj u PLD vrećicu i na vrećici obavezno crnim markerom upisuje broj biračkog mjesta.

POGLAVLJE VI. IZBORNI REZULTATI

Odjeljak A. – Imenovanje referenata za unos rezultata, supervizora i kontrolora izbornih rezultata

Član 67.
(Referenti za unos izbornih rezultata)

(1) Izborna komisija je obavezna da najkasnije 15 dana prije dana održavanja izbora osigura i umreži dovoljan broj računara putem kojih će se izvršiti unos izbornih rezultata. Pod dovoljnim brojem računara se smatra broj računara koji se dobije kada se broj biračkih mjesta podjeli sa brojem 15.

(2) Izborna komisija je obavezna da najkasnije 15 dana prije dana održavanja izbora donese rješenje kojim će imenovati dovoljan broj referenata za unos izbornih rezultata (u daljem tekstu: referent).

Pod dovoljnim brojem smatraju se četiri referenta za svaki računar iz stava (1) ovog člana za opće izbore, odnosno dva referenta za svaki računar za lokalne izbore. Za opće izbore referenti rade u dvije smjene po dva referenta. Prilikom unosa izbornih rezultata jedan referent čita podatke sa zelene kopije obrasca, dok referent unosi te podatke u aplikaciju.

(3) Izborna komisija će prilikom imenovanja referenata iz stave (2) ovog člana voditi računa da imenovani poznaju rad na računarima i koji su po mogućnosti već obavljali poslove referenta za unos izbornih rezultata.

(4) Referenti iz stava (2) ovog člana u aplikaciju za unos izbornih rezultata u Jedinostvenom informacionom izbornom sistemu Bosne i Hercegovine (JIIS BiH) za svako biračko mjesto unose:

- činjenicu da je biračko mjesto otvoreno;
- odziv birača, odnosno broj potpisa na izvodu iz Centralnog biračkog spiska, u 11.00, 15.00 i 19.00 sati. Centralna izborna komisija BiH može odrediti drugo vrijeme za unos;
- činjenicu da je biračko mjesto zatvoreno;
- sve podatke sa Obrasca brojnog stanja;
- izborne rezultate za svaki nivo vlasti za koji se provode izbori;
- vrše kontrolu unijetih izbornih rezultata.

(5) Referent je obavezan prisustvovati obuci organiziranoj od strane izborne komisije prema posebnom planu i programu koji usvoji Centralna izborna komisija BiH. Za svoj rad odgovora izornoj komisiji i ima pravo na naknadu čiju visina se određuje izborna komisija u rješenju o imenovanju.

Član 68.

(Supervizori izbornih rezultata)

(1) Izborna komisija je obavezna da najkasnije 15 dana prije dana održavanja izbora donese rješenje kojim će imenovati supervizora izbornih rezultata (u daljem tekstu: supervizor). Supervizor je osoba koja poznaje rad na računarima i koja je po mogućnosti obavljala poslove supervizora izbornih rezultata.

(2) Supervizor će u aplikaciji iz člana 67. stav (4) ovog Pravilnika:

- kontrolirati da svi podaci za svako biračko mjesto budu uneseni od strane referenata za unos;
- korigirati one podatke u aplikaciji za koje se utvrdi da referenti za unos su unijeli pogrešne podatke.

(3) Supervizor je obavezan prisustvovati obuci organiziranoj od strane izborne komisije prema posebnom planu i programu koji usvoji Centralna izborna komisija BiH. Za svoj rad odgovora izornoj komisiji i ima pravo na naknadu čiju visina se određuje izborna komisija u rješenju o imenovanju.

Član 69.
(Kontrolori izbornih rezultata)

- (1) Izborna komisija je obavezna da sa danom objave izbora od strane Centralne izborne komisije Bosne i Hercegovine objavi javni oglas za prijavu kandidata za kontrolore izbornih rezultata.
- (2) Javni oglas iz stava (1) ovog člana sadrži:
 - Naveden broj kontrolora izbornih rezultata koji će biti imenovani i to minimalno 2 kontrolora izbornih rezultata za izborne komisije koje imaju manje od 50 biračkih mjesta i 3 kontrolora izbornih rezultata za biračka mjesta koja imaju 50 i više biračkih mjesta;
 - Uvjet da je kandidat državljanin Bosne i Hercegovine;
 - Uvjet da kandidat treba imati najmanje srednju stručnu spremu;
 - Uvjet da kandidat treba imati izbornu iskustvo, rad na poslovima kontrolora izbornih rezultata, rad na poslovima supervizora izbornih rezultata, rad na poslovima unosa izbornih rezultata i rad u biračkom odboru kao predsjednik ili član biračkog odbora;
 - Vrijeme od 5 godina na koje će biti imenovan kontrolor izbornih rezultata;
 - Rok od 15 dana, od dana objave javnog oglasa u kom kandidati trebaju da predaju svoje prijave.
- (3) Nakon isteka roka za objavu javnog oglasa, izborna komisija će provesti postupak intervjua sa svim prijavljenim kandidatima za kontrolore i imenovati kontrolora u skladu sa stavom (2) alineja 1 ovog člana. Rješenje o imenovanju kontrolora izbornih rezultata se odmah po donošenju dostavlja Centralnoj izornoj komisiji Bosne i Hercegovine.
- (4) Ukoliko na javni oglas iz stava (1) ovog člana ne bude dovoljno prijavljenih kandidata, izborna komisija imenuje kontrolore izbornih rezultata iz reda uposlenika grada/općine, odnosno drugih lica koje ispunjavaju uvjete predviđene javnim oglasom.
- (5) Centralna izborna komisija Bosne i Hercegovine će uspostaviti registar kontrolora izbornih rezultata i vodit će elektronski bazu svih imenovanih kontrolora izbornih rezultata, kao i evidenciju o prisustvu obukama za sve kontrolore izbornih rezultata.
- (6) Centralna izborna komisija Bosne i Hercegovine je obavezna organizirati obuku, testiranje i certificiranje za sve kontrolore izbornih rezultata. Ova obuka se organizira jednom godišnje, s tim da se u izornoj godini obavezno organizira najkasnije 30 dana prije dana održavanja izbora.
- (7) Kontrolor izbornih rezultata se imenuje na 5 godina. Mandat kontroloru izbornih rezultata prestaje i prije isteka roka od 5 godina ukoliko kontrolor da ostavku, umre, bude razriješen od strane izborne komisije zbog neispunjenja obaveza ili izrečene administrativne mjere od Centralne izborne komisija Bosne i Hercegovine. U slučaju prestanka mandata Izborna komisija imenuje novog kontrolora na osnovu procedure propisane u stavovima (1), (2) i (3) ovog člana.
- (8) Kontrolor izbornih rezultata obavlja sljedeće poslove:
 - obučava supervizora izbornih rezultata i referente za unos izbornih rezultata;
 - vrši korekcije u aplikaciji za unos izbornih rezultata matematičkih nepravilnosti u statističkim podacima na svim biračkim mjestima na kojima nisu ispoštovane sve propisane matematičke radnje i to :
 - a) vrši poređenje broja potpisa i broja glasačkih listića u glasačkoj kutiji te korigira u testu tačnosti ukoliko nije ispravno utvrđeno u testu tačnosti, isto tako mijenja upisani broj

potpisa ukoliko je birački odbor umjesto broja potpisa naveo podatak broja imena na Izvodu iz Centralnog biračkog spiska;

- b) korigira zbir broja nevažećih neoznačenih i nevažećih ostalih glasačkih listića ukoliko nije tačno izvršen;
- c) korigira ukupan broj važećih glasačkih listića ukoliko nije ispravan i ne predstavlja sumu svih glasova po kandidatima za većinski glas ili sumu glasova po političkim partijama za sistem proporcionalnu zastupljenost;
- d) korigira zbir ukupnog broja nevažećih glasačkih listića i ukupnog broja važećih glasačkih listića ukoliko nije ispravno utvrđeno;
- e) korigira u testu tačnosti poređenje ukupnog broja glasačkih listića u glasačkoj kutiji i zbira ukupnog broja nevažećih glasačkih listića i ukupnog broja važećih glasačkih listića ukoliko nije ispravno utvrđeno.

(9) Nakon izvršenih korekcija, kontrolor izbornih rezultata izbornoj komisiji podnosi aplikacijski generisan Izvještaj za nevalidna biračka mjesta, sa posebnim osvrtom na biračka mjesta iz stava (8) tačka e) ovog člana, gdje se test tačnosti razlikuje od 0, i za biračka mjesta na kojima je kandidat dobio više glasova od političkog subjekta za sistem proporcionalne zastupljenosti. Za navedena biračka mjesta kontrolor izbornih rezultata izbornoj komisiji dostavlja aplikacijski generisane Zahtjeve za otvaranje vreće i pravilno objedinjavanja utvrđenih rezultata, na daljnje postupanje. Izborna komisija ove Zahtjeve, ovjerene pečatom i potpisom, upućuje putem službenog e-mail-a Centralnoj izbornoj komisiji BiH na odobrenje. Na osnovu zaprimljenih Zahtjeva Centralna izborna komisija BiH donosi Naredbe za otvaranje vreća i pravilno objedinjavanja utvrđenih rezultata, koje istim putem upućuje izbornoj komisiji.

(10) Centralna izborna komisija Bosne i Hercegovine najkasnije 15 dana prije dana održavanja izbora imenuje Glavnog kontrolora izbornih rezultata, dva zamjenika Glavnog kontrolora i tri kontrolora izbornih rezultata iz reda zaposlenih u Sekretarijatu Centralne izborne komisije Bosne i Hercegovine.

(11) Kontrolori iz stava (10) ovog člana obavljaju sljedeće aktivnosti:

- vrše poređenje broja potpisa iz odziva, sa obrasca brojnog stanja i sa obrazaca za zbirne rezultate za sva biračka mjesta;
- vrše poređenje broja zaprimljenih i broja neiskorištenih glasačkih listića za svaki izborni nivo;
- vrše korekcije u aplikaciji po proceduri opisanoj u stavu (8) od tačke a) do tačke e) ovog člana za sva biračka mjesta na kojim kontrolori izbornih rezultata izborne komisije ne izvrše korekcije;
- vrše kontrolu izbornih rezultata unesenih u Glavnom centru za brojanje po proceduri opisanoj u stavu (8) od tačke a) do tačke e) ovog člana;
- provjeravaju osnovanost prigovora, žalbi i zahtjeva za ponovno brojanje glasačkih listića;
- pripremaju izvještaj Centralnoj izbornoj komisiji Bosne i Hercegovine o svim uočenim nepravilnostima sa prijedlogom mjera za ispravljanje nepravilnosti.

(12) Kontrolori izbornih rezultata iz stava (10) ovog člana su direktno odgovorni Centralnoj izbornoj komisiji Bosne i Hercegovine.

Odjeljak B. – Unos rezultata

Član 70.

(Prvi preliminarni, nezvanični i nekompletni rezultati izbora)

(1) Izborna komisija je obavezna sa zelenih kopija utvrđene izborne rezultate sa svih redovnih biračkih mjesta za nivo vlasti iz člana 44. stav (1) tačka a) alineja 1) ili tačka b) alineja 1), do 21.00 sat unijeti u JIIS aplikaciju. Za ostale nivoe vlasti iz člana 44. stav (1) tačka a) alineja 2), 3) i 4) ili tačka b) alineja 2), 3) i 4) ovog Pravilnika, izborna komisija utvrđene izborne rezultate sa zelenih kopija dostavljenih sa redovnih biračkih mjesta unosi u JIIS aplikaciju intenzivno do 24.00 sata.

(2) Za proces iz stava (1) ovog člana, izborna komisija može angažirati i ovlastiti koordinate koje će sa redovnih biračkih mjesta preuzeti zelene kopije obrazaca sa vjerodostojnim izbornim rezultatima iz biračkog odbora, te angažirati i ovlastiti osoblje koje će vršiti unos rezultata izbora o čemu donosi posebno rješenje.

(3) Nakon završene procedure iz stava (2) ovog člana, kontrolor izbornih rezultata izborne komisije vrši kontrolu izbornih rezultata propisanu u članu 69. ovog Pravilnika.

(4) Na osnovi postupka utvrđenog u stavu (1) i (2), ovog člana, Centralna izborna komisija BiH najkasnije pet sati po zatvaranju biračkih mjesta, u skladu s članom 5.29a Izbornog zakona BiH, objavljuje prve nepotpune preliminarne rezultate s redovnih biračkih mjesta.

(5) Izborna komisija je odgovorna za tačnost izvještaja koje dostavlja Centralnoj izbornoj komisiji BiH.

Član 71.

(Drugi preliminarni, nezvanični i nekompletni rezultati izbora)

Izborna komisija, po istom postupku iz člana 70. stav (2), (3), (4) i (5) ovog Pravilnika, nastavlja sukcesivno unositi izborne rezultate u JIIS aplikaciju sa zelenih kopija za nivo vlasti iz člana 44. stav (1) tačka a) alineja 2), 3) i 4) ili tačka b) alineja 2), 3) i 4) ovog Pravilnika, a najkasnije do 17.00 sati narednog dana.

Član 72.

(Objedinjeni izborni rezultati)

(1) Nakon što od biračkih odbora preuzme svu dokumentaciju i materijale za izbore, izborna komisija utvrđuje objedinjene izborne rezultate glasanja koje je provedeno u toj osnovnoj izbornoj jedinici za sve nivoe vlasti, i o tome sačinjava zapisnik koji se podnosi Centralnoj izbornoj komisiji BiH u roku od 24 sata nakon zatvaranja biračkih mjesta, a najkasnije do 19.00 sati, dan poslije održavanja izbora.

(2) Ukoliko izborna komisija nije u mogućnosti objediniti utvrđene izborne rezultate zbog toga što birački odbor nije pravilno izvršio brojanje glasačkih listića, ili radi odstupanja koja ukazuju na neregularnosti predsjednika i članova biračkog odbora kod brojanja glasova, izborna komisija podnosi izvještaj Centralnoj izbornoj komisiji BiH, sa zahtjevom za otvaranje vreće, kako bi se izvršilo pravilno brojanje glasačkih listića u cilju pravilnog objedinjavanja utvrđenih izbornih

rezultata. Centralna izborna komisija BiH na osnovu tog zahtjeva donosi naredbu o otvaranju vreće sa glasačkim materijalom i brojanje glasačkih listića u cilju pravilnog objedinjavanja utvrđenih izbornih rezultata.

(3) Izborna komisija će pisanim zahtjevom od Centralne izborne komisije BiH tražiti naredbu da se otvore vreće u cilju:

- a) pravilnog pakovanja izbornog materijala ukoliko birački odbor nije spakovao izborni materijal po shemi pakiranja,
- b) pronalaska zelenih kopija obrazaca.

Izborna komisija u zahtjevu za tačku a) ovog stava treba navesti broj biračkog mjesta i pojašnjenje kako je izborni materijal spakiran, dok u zahtjevu za tačku b) treba navesti broj biračkog mjesta i broj nivoa za koji se treba vreća otvarati. U oba slučaja po dobijanju naredbe aktivnosti provodi isti birački odbor u sjedištu izborne komisije, a izborna komisija je dužna osigurati da sve aktivnosti tog biračkog odbora nadgleda posmatrač koji je akreditiran za posmatranje rada izborne komisije. Birački odbor u ovom slučaju treba voditi Zapisnik sa otvaranja vreće.

(4) Po dobijanju naredbe iz stava (2) ovog člana, izborna komisija vrši pripreme za brojanje na način da imenuje tim za otvaranje vreća i brojanje glasačkih listića u skladu sa članom 22. Pravilnika o utvrđivanju kvalifikacija i postupku imenovanja članova biračkih odbora koji će vršiti brojanje glasačkih listića u cilju pravilnog objedinjavanja utvrđenih izbornih rezultata i pisanim putem obavještava akreditirane posmatrače koji imaju pravo posmatrati rad izborne komisije i ovog tima, o mjestu i vremenu navedenog brojanja glasačkih listića. Izborna komisija organizira brojanje glasačkih listića odmah po dobijanju naredbe od Centralne izborne komisije BiH, vodeći računa o obaveznom prisustvu akreditiranih posmatrača. Tim za otvaranje vreće i brojanje glasačkih listića vrši brojanje glasačkih listića u skladu s procedurama za brojanje utvrđenim u članovima 46, 47, 48. i 49. ovog Pravilnika. Za potrebe ovog brojanja glasačkih listića, izborna komisija će timu za otvaranje vreće i brojanje glasačkih listića dostaviti sljedeći set materijala: obrazac Zapisnika sa otvaranja vreće koji predsjednik izborne komisije ovjerava svojim potpisom i pečatom izborne komisije; odgovarajući obrazac za zbirne rezultate sa kompletom pomoćnih obrazaca, ukoliko se broje glasački listići za nivo otvorene liste; dva plastična pečata za zaštitu vreća i jednu providnu plastičnu manju vreću. Centralna izborna komisija BiH će, za potrebe brojanja glasačkih listića iz ovog stava, izbornim komisijama dostaviti rezervne količine obrazaca za zbirne rezultate za nivoe za koje se provode izbori, koji na koricama imaju naljepnicu sa oznakom "PONOVRNO OTVARANJE VREĆE". Sve rezervne obrasce koji ne budu iskorišteni, izborne komisije su obavezne vratiti Centralnoj izbornoj komisiji BiH sa izbornim materijalom.

(5) Za potrebe pravilnog objedinjavanja utvrđenih izbornih rezultata i brojanje glasačkih listića iz stava (3) ovog člana, izborna komisija dužna je osigurati adekvatan prostor, sa obučanim i certificiranim osobljem i mjerama sigurnosti.

(6) Sve izmjene podataka izborna komisija je dužna izložiti javno, kako bi bile dostupne javnosti.

(7) Po završenoj proceduri pravilnog objedinjavanja utvrđenih izbornih rezultata iz stava (3) ovog člana, a najkasnije 3 (tri) dana do 19,00 sati poslije održanih izbora, izborna komisija dostavlja Centralnoj izbornoj komisiji BiH zapečaćenu providnu plastičnu manju vreću sa originalnim obrascem za zbirne rezultate u koricama; pomoćne obrasce za drugi krug brojanja glasačkih listića

po kandidatima, ukoliko je tim koristio pomoćne obrasce i zapisnik sa otvaranje vreće iz stava (3) ovog člana.

(8) Objedinjeni izborni rezultati glasanja u osnovnoj izbornoj jedinici upisuju se u obrasce za zbirne rezultate ZR (većinski glas i proporcionalna zastupljenost) na nivou osnovne izborne jedinice. Obrasci za zbirne rezultate na nivou osnovne izborne jedinice sadrže sve podatke koje sadrže i obrasci za zbirne rezultate na redovnim biračkim mjestima.

(9) Izborna komisija odmah, nakon prijema izvoda iz konačnog Centralnog biračkog spiska za biračko mjesto za izdavanje nepotvrđenih glasačkih listića iz člana 23. stav (2) ovog Pravilnika, unosi podatke o biračima koji su glasali na ovom biračkom mjestu u odgovarajuću aplikaciju JIIS, te navedeni izvod dostavlja Centralnoj izbornoj komisiji BiH putem faks-aparata ili elektronskim putem.

(10) Izborna komisija nakon prijema izbornog materijala sa svih biračkih mjesta na teritoriji osnovne izborne jedinice, a u roku od 12 do 24 sata po zatvaranju biračkih mjesta, predaje Centralnoj izbornoj komisiji BiH zaštitne vreće s glasačkim listićima i materijalom koji se broje u Glavnom centru za brojanje (koverte s glasačkim listićima birača koji su glasali u odsustvu i nepotvrđenim glasačkim listićima sa svih biračkih mjesta u toj osnovnoj izbornoj jedinici), originalne obrasce sa redovnih biračkih mjesta, zajedno sa svim providnim plastičnim vrećama u kojima su izvodi iz Centralnog biračkog spiska, zapisnici i pomoćni obrasci za drugi krug brojanja po kandidatima. Sve zaštitne vreće moraju biti zapečaćene odgovarajućim plastičnim pečatima na biračkim mjestima i jasno označene šiframa biračkih mjesta.

(11) Izborna komisija glasačke listiće s redovnih biračkih mjesta i preostali izborni materijal predaje Centralnoj izbornoj komisiji BiH počev od četvrtog dana od dana izbora, a najkasnije do osmog dana nakon dana izbora. Zaštitne vreće moraju biti zapečaćene odgovarajućim plastičnim pečatima na biračkim mjestima i jasno označene šiframa nivoa i biračkih mjesta.

Odjeljak C. Utvrđivanje izbornih rezultata – član 5.29 Izbornog zakona BiH

Član 73.

(Utvrđivanje izbornih rezultata)

Centralna izborna komisija BiH utvrđuje i objavljuje izborne rezultate nakon objedinjavanja rezultata glasanja s redovnih biračkih mjesta i rezultata dobijenih prebrojavanjem glasova u Glavnom centru za brojanje najkasnije 20 dana nakon održavanja izbora.

Član 74.

(Uvid u objavljene izborne rezultate)

Centralna izborna komisija BiH odmah po donošenju odluke o objavi izbornih rezultata, u detaljnom tabelarnom prikazu rezultata glasanja na nivou biračkog mjesta po političkim subjektima i kandidatima stavlja na raspolaganje javnosti putem internet-stranice Centralne izborne komisije BiH.

Odjeljak D. Potvrđivanje izbornih rezultata

Član 75.

(Potvrđivanje izbornih rezultata – član 5.32 Izbornog zakona BiH)

(1) Centralna izborna komisija BiH, nakon završetka ponovnog brojanja glasačkih listića i isteka roka za podnošenje žalbe, odnosno nakon pravosnažnosti odluka, a najkasnije 30 dana od dana održavanja izbora, potvrđuje izborne rezultate.

(2) Centralna izborna komisija BiH potvrđene izborne rezultate, s raspodijeljenim mandatima i imenima kandidata unutar tih političkih subjekata objavljuje u službenim glasilima, internet-stranici Centralne izborne komisije BiH i sredstvima javnog informiranja.

DIO TREĆI – PROVOĐENJE LOKALNIH IZBORA

POGLAVLJE VII. IZBORNI MATERIJAL, PRIMOPREDAJA I NAČIN GLASANJA

Član 76.

(Primjena odredbi)

Odredbe ovog Pravilnika u dijelu koji se odnosi na osiguranje izbornog materijala, primopredaju izbornog materijala, postupak glasanja i brojanja glasova, imenovanje referenata za unos, supervizora i kontrolora, unos prvih i drugih nepotpunih preliminarnih izbornih rezultata, shodno se primjenjuju i za organizaciju i provedbu Lokalnih izbora.

POGLAVLJE VIII. BROJANJE GLASAČKIH LISTIĆA, PAKIRANJE IZBORNOG MATERIJALA I IZBORNI REZULTATI

Član 77.

(Redoslijed brojanja glasačkih listića)

Glasački listići za izborne nivoe broje se sljedećim redoslijedom:

- a) načelnik općine, odnosno gradonačelnik grada kada se bira neposredno;
- b) gradonačelnik Grada Istočno Sarajevo u osnovnim izbornim jedinicama gdje se provode izbori (Sokolac 121B, Istočna Ilidža 132B, Istočni Stari Grad 138B, Istočno Novo Sarajevo 140B, Trnovo 142B i Pale 144B),
- c) gradska izborna jedinica (199) u Gradu Mostaru,
- d) općinsko vijeće, odnosno skupština općine, odnosno skupština grada,
- e) izborna jedinica gradskog područja (151-156) Grada Mostara.

Član 78.

(Pakiranje izbornog materijala – redovna biračka mjesta)

(1) Na redovnim biračkim mjestima izborni materijal pakira birački odbor na način utvrđen odredbama ovog člana.

- (2) Glasački listići za načelnika općine i gradonačelnika grada pakiraju se u **SIVE ZAŠTITNE VREĆE** tako što se u njih stavlja:
- prebrojani važeći glasački listići i nevažeći glasački listići,
 - providna plastična vreća u kojoj je koverta s Obrascem za zbirne rezultate ZR (većinski glas) – plava kopija.
- (3) Glasački listići za gradonačelnika grada Istočno Sarajevo pakiraju se u **ŽUTE ZAŠTITNE VREĆE** tako što se u njih stavlja:
- prebrojani važeći glasački listići i nevažeći glasački listići,
 - providna plastična vreća u kojoj je koverta s Obrascem za zbirne rezultate ZR (većinski glas) – plava kopija.
- (4) Glasački listići za općinsko vijeće, skupštinu općine, skupštinu grada i skupštinu Brčko distrikta BiH pakiraju se u **PLAVE ZAŠTITNE VREĆE** tako što se u njih stavlja:
- prebrojani važeći glasački listići i nevažeći glasački listići,
 - providna plastična vreća u kojoj je koverta s Obrascem za zbirne rezultate ZR (otvorena lista) – plava kopija.
- (5) Neiskorišteni i oštećeni glasački listići za načelnika općine, gradonačelnika grada, gradonačelnika Grada Istočno Sarajevo u osnovnim izbornim jedinicama gdje se provode izbori, općinsko vijeće, skupštinu općine, skupštinu grada i skupštinu Brčko distrikta BiH pakiraju se u **PROVIDNE VEĆE ZAŠTITNE VREĆE** po jedna tako što se u njih stavlja:
- neiskorišteni glasački listići (upakirani u originalne kutije) i
 - koverta upropašteni glasački listići.
- (6) U **PROVIDNE MANJE ZAŠTITNE VREĆE** pakiraju se:
- pomoćni obrasci za brojanje, koji su korišteni za drugi krug brojanja glasova po kandidatima;
 - Zapisnik – original u koricama i
 - izvod iz konačnog Centralnog biračkog spiska za redovne birače.
- (7) Kopije obrazaca koje je birački odbor koristio tokom glasanja i brojanja glasačkih listića na biračkom mjestu birački odbor pakiraju na sljedeći način:
- u kovertu za predsjednika biračkog odbora stavlja se:
 - Obrazac za brojno stanje BS – crvena kopija,
 - Obrazac za zbirne rezultate ZR (većinski glas) – crvena kopija,
 - Obrazac za zbirne rezultate ZR (proporcionalna zastupljenost) – crvena kopija;
 - u kovertu za predsjednika izborne komisije stavlja se:
 - Obrazac za brojno stanje BS – zelena kopija,
 - Obrazac za zbirne rezultate ZR (većinski glas) – zelena kopija,
 - Obrazac za zbirne rezultate ZR (proporcionalna zastupljenost) – zelena kopija i
 - Zapisnik – zelena kopija.

U osnovnim izbornim jedinicama u kojima se provode izbori za gradonačelnika Grada Istočno Sarajevo u alineji a) i b) dodaju se kopije, crvena i zelena Obrasca za zbirne rezultate većinski glas za gradonačelnika Grada Istočno Sarajevo.

(8) Original obrasce koje je birački odbor koristio tokom glasanja i brojanja glasačkih listića na biračkom mjestu birački odbor pakiraju na sljedeći način:

- a) u kovertu A3 za Centralnu izbornu komisiju BiH stavljaju se:
 - 1) Obrazac za brojno stanje BS – original u koricama,
 - 2) Obrazac za zbirne rezultate ZR (većinski glas) – original u koricama i
 - 3) Obrazac za zbirne rezultate ZR (proporcionalna zastupljenost) – original u

koricama.

U osnovnim izbornim jedinicama u kojima se provode izbori za gradonačelnika Grada Istočno Sarajevo u alineji a) dodaje se original Obrasca za zbirne rezultate većinski glas za gradonačelnika Grada Istočno Sarajevo.

(9) Birački odbor svaku od navedenih vreća označava crnim markerom (naprimjer: broj biračkog mjesta 133A025 na dva mjesta na zaštitnoj vreći. Svaka vreća mora biti čvrsto zatvorena plastičnim pečatom čiji se broj upisuje u odgovarajućem obrascu na predviđenom mjestu.

(10) U Gradu Mostaru birački odbor pakira glasačke listiće za nivo Gradska izborna jedinica – 199 u jednu tamno plavu zaštitnu vreću, a glasačke listiće za nivo svoje izborne jedinice gradskog područja (151, 152, 153, 154, 155 ili 156) u drugu svijetlo plavu zaštitnu vreću, na način propisan u stavu (4) ovog člana. Preostali izborni materijal birački odbor pakira na način propisan u stavovima (5), (6), (7) i (8) ovog člana.

(11) Birački odbor je dužan da na zaštitne tamno plave vreće, pored upisanog broja biračkog mjesta, upiše markerom KOD-199, odnosno KOD svoje izborne jedinice gradskog područja (151–156) glasačkih listića koji su upakirani u svijetlo plavu vreću.

(12) Izborna komisija je, po preuzimanju izbornog materijala od biračkog odbora, obavezna u dostavljene registratore i U-folije pakirati izborni materijal na način:

- a) da u jednu U-foliju pakira Obrazac za brojno stanje, obrasce Evidencija glasačkih listića za sve nivoe vlasti i obrazac Primopredaja izbornog materijala BO;
- b) da u jednu U-foliju pakira Obrazac za zbirne rezultate ZR – većinski glas;
- c) da u jednu U-foliju pakira Obrazac za zbirne rezultate ZR – proporcionalna zastupljenost.

Tako formirane U-folije pakira u registratore na način da materijal iz tačke a) pakira u jedan registrator, materijal iz tačke b) pakira u poseban registrator i materijal iz tačke c) pakira u poseban registrator, na kojima mora biti ispisano: kod i naziv općine, naziv materijala ili kod nivoa čiji su obrasci u registratoru, početni i krajnji broj biračkog mjesta, čije su U-folije stavljene u taj registrator i redni broj registratora (naprimjer: 133A, Novi Grad Sarajevo, BS, 001-160, 1-1; 133A, Novi Grad Sarajevo, NA, 001-160, 1-1; 133A, Novi Grad Sarajevo, OV, 001-050, 1-3. Izborne komisije iz člana 77. tačka b) ovog pravilnika pakiraju još jedan registrator sa obrascima za Gradonačelnika Grada Istočno Sarajevo.

(13) Obrasci iz stava (12) tačka a), b) i c) ovog člana, u U-folijama se pakiraju na način da se presaviju tako da se kroz U-foliju jasno vidi broj biračkog mjesta, ukoliko birački odbor nije napisao

broj biračkog mjesta izborna komisija je prilikom pakiranja obavezna u predviđenu rubriku upisati broj biračkog mjesta.

(14) Birački odbor pakira štambilj u PLD vrećicu i na vrećici obavezno crnim markerom upisuje broj biračkog mjesta.

(15) Odredbe stava (2) ovog člana ne primjenjuju se za biračke odbore u Brčko distriktu BiH jer se gradonačelnik Brčko distrikta Bosne i Hercegovine ne bira direktno.

Član 79.

(Pakiranje izbornog materijala nakon brojanja i objedinjavanja)

(1) Birački odbor ili tim iz člana 72. stav (4) ovog Pravilnika izborni materijal pakira na način kako je propisano ovim Pravilnikom, i to u istu vreću, zajedno sa pečatom kojim je birački odbor prethodno zapečatio tu vreću.

(2) Birački odbor ili tim vreću iz stava (1) ovog člana pečati novim pečatom čiji je broj upisan na originalnom obrascu kojeg je tim prebrojao.

Član 80.

(Pakiranje izbornog materijala na drugim biračkim mjestima)

Izborni materijal na biračkim mjestima za glasanje u odsustvu, za izdavanje nepotvrđenih-kovetiranih glasačkih listića i mobilnim timovima se pakira na način utvrđen u članu 63. do 65. ovog Pravilnika.

Član 81.

(Izborni rezultati)

Postupak za izborne rezultate na općim izborima propisan u članovima od 70. do 74. ovog Pravilnika primjenjuje se i na izborne rezultate na lokalnim izborima.

DIO ČETVRTI – PRIJEVREMENI, PONOVI I ODGOĐENI IZBORI

POGLAVLJE IX. PRIJEVREMENI IZBORI – član 14.3 stav (1) Izbornog zakona BiH

Član 82.

(Primjena)

Prijevremeni izbori za organe vlasti u Bosni i Hercegovini provode se u skladu sa Izbornim zakonom BiH, posebnim propisima kojima su regulirani prijevremeni izbori za izbor pojedinih organa vlasti i po proceduri utvrđenoj u ovom Pravilniku.

Član 83.
(Rokovi izbornih aktivnosti)

Rokove izbornih aktivnosti za prijevremene izbore utvrđuje Centralna izborna komisija BiH posebnim Uputstvom o rokovima izbornih aktivnosti za održavanje prijevremenih izbora.

Član 84.
(Prijava političkih stranaka i nezavisnih kandidata koji su učestvovali na redovnim izborima)

(1) Političke stranke i nezavisni kandidati koji su bili ovjereni za učešće na posljednjim redovnim izborima ne moraju ponovno podnositi cjelokupnu potrebnu dokumentaciju za ovjeru učešća na prijevremenim izborima, već se prijava s dokumentacijom koja je podnesena za redovne izbore prihvata uz podnošenje novog popunjenog obrasca njihove prijave.

(2) Političke stranke i nezavisni kandidati koji su ovjereni na posljednjim redovnim izborima za općinskog načelnika nisu u obavezi prikupiti potpise podrške niti izvršiti uplatu takse za učešće na prijevremenim izborima.

(3) Političke stranke koje nisu bile ovjerene za učešće na posljednjim redovnim izborima za općinskog načelnika, a bile su ovjerene za općinsko/gradsko vijeće nisu u obavezi prikupiti potpise podrške, ali su obavezne izvršiti uplatu takse za učešće na prijevremenim izborima.

Član 85.
(Prijava političkih stranaka i nezavisnih kandidata koji nisu učestvovali na redovnim izborima)

(1) Političke stranke i nezavisni kandidati koji nisu učestvovali na posljednjim redovnim izborima uz prijavu učešća na prijevremenim izborima podnose sljedeću dokumentaciju:

- a) Rješenje o upisu u registar kod nadležnog organa; ukoliko je rješenje starije od 60 dana dostaviti i izvod iz sudskog registra koji nije stariji od 60 dana, u skladu s članom 4.3 Izbornog zakona BiH (podnose samo političke stranke);
- b) ovjerenu izjavu propisanu članom 1.6 i 1.13 Izbornog zakona BiH (izjava se može dati i lično u sjedištu Centralne izborne komisije BiH);
- c) dokaz o uplaćenom novčanom iznosu takse za ovjeru u skladu s članom 4. ovog Pravilnika;
- d) finansijski izvještaj koji obuhvata period od tri (3) mjeseca prije podnošenja prijave, u skladu s članom 15.1 Izbornog zakona BiH;
- e) ovjerenu izjavu da nema neizmirenih obaveza po osnovu pravosnažnih i izvršnih odluka o izrečenim novčanim kaznama koje je izrekla Centralna izborna komisija BiH, osim u slučaju da se plaćanje kazne vrši u ratama, u skladu sa Odlukom Centralne izborne komisije BiH i
- f) broj računa za finansiranje izborne kampanje.

(2) Političke stranke i nezavisni kandidati koji nisu učestvovali na redovnim izborima dužni su uplatiti taksu za ovjeru učešća na prijevremenim izborima u iznosu propisanom članom 4.16 Izbornog zakona BiH.

Član 86.
(Prijava koalicija)

Koalicije koje su ovjerene na posljednjim redovnim izborima za gradonačelnika, odnosno načelnika nisu obavezni vršiti dodatnu prijavu nego potvrditi raniju prijavu, podnošenjem novog popunjenog obrasca prijave.

Član 87.
(Birači upisani u Centralni birački spisak)

- (1) Svi birači koji su upisani u Centralni birački spisak mogu glasati na prijevremenim izborima.
- (2) Centralna izborna komisija BiH će obrazac prijave za glasanje putem pošte za nove registrante objaviti na zvaničnoj internet-stranici Centralne izborne komisije BiH i dostaviti ih svim DKP-ima Bosne i Hercegovine u inozemstvu.
- (3) Birač koji ima status raseljenog lica ostaje izražena biračka opcija koju je imao na zadnjim provedenim redovnim izborima.

Član 88.
(Obavještenje biračima)

Izborna komisija koja provodi prijevremene izbore obavezna je proslijediti izbornim komisijama na čijem području se nalaze birači koji su upisani u izvod iz Centralnog biračkog spiska za raseljena lica BiH spisak raseljenih lica s podatkom gdje i na kojem biračkom mjestu mogu ostvariti svoje biračko pravo. Izborna komisija na čijem području se nalaze raseljena lica dužna je na prigodan način i pravovremeno obavijestiti ta lica gdje i na koji način će glasati.

Član 89.
(Glavni centar za brojanje)

Centralna izborna komisija BiH može posebnom odlukom formirati Glavni centar za brojanje za svake prijevremene izbore. Istom odlukom se utvrđuju poslovi koji se obavljaju u Glavnom centru za brojanje, lokacija na kojoj se uspostavlja Glavni centar za brojanje i određuje vremenski period u kojem će raditi Glavni centar za brojanje i druga pitanja bitna za funkcioniranje rada Glavnog centra za brojanje.

POGLAVLJE X. PONOVNI IZBORI – član 14.1 Izbornog zakona BiH

Član 90.
(Procedura)

- (1) Ukoliko Centralna izborna komisija BiH ustanovi da je za vrijeme glasanja ili brojanja glasačkih listića došlo do nepravilnosti koje mogu utjecati na rezultate izbora i poništi izbore u izbornoj jedinici ili na nekom biračkom mjestu, provode se ponovni izbori.

(2) Ponovni izbori provode se na osnovu istih kandidatskih listi i istih izvoda iz Centralnog biračkog spiska koji su korišteni na poništenim izborima.

(3) Centralna izborna komisija BiH određuje dan održavanja ponovnih izbora, a najkasnije 14 dana od dana pravosnažnosti odluke Centralne izborne komisije BiH o poništenju izbora.

(4) Ponovni izbori provode se na istoj lokaciji biračkog mjesta i po proceduri propisanoj u Dijelu II. ovog pravilnika.

POGLAVLJE XI. ODGOĐENI IZBORI – član 14.2 Izbornog zakona BiH

Član 91. (Postupak provođenja)

(1) Ukoliko u nekoj izbornoj jedinici ili biračkom mjestu glasanje nije obavljeno onog dana koji je utvrđen za glasanje, provode se odgođeni izbori.

(2) Na osnovi činjenica koje ukazuju da izbore nije moguće provesti u skladu s odredbama Izbornog zakona BiH, Centralna izborna komisija BiH donosi odluku o odgađanju izbora na određenom biračkom mjestu ili u izbornoj jedinici, a najkasnije 30 dana od dana koji je određen za glasanje na redovnim izborima.

(3) Odgođene izbore raspisuje Centralna izborna komisija BiH.

(4) Odgođeni izbori u pravilu se provode u roku od sedam dana, a najkasnije 30 dana od dana koji je određen za glasanje na redovnim izborima.

(5) Odgođeni izbori se provode po proceduri propisanoj u Dijelu II. ovog Pravilnika.

DIO PETI – ZAVRŠNE ODREDBE

Član 92. (Shematski prikaz)

Sastavni dio ovog pravilnika su i shematski prikazi načina pakiranja izbornog materijala.

Član 93. (Obrasci)

Sastavni dio ovog Pravilnika su:

- a) Zapisnik o radu biračkog odbora – ZARBO,
- b) Obrazac za brojno stanje BS – redovno biračko mjesto,
- c) Obrazac za brojno stanje BSO – biračko mjesto za glasanje u odsustvu (koji se koristi i u DKPBiH),
- d) Obrazac za brojno stanje BSN – biračko mjesto za glasanje nepotvrđenim glasačkim listićima,
- e) Obrazac za brojno stanje BSM – mobilni tim,
- f) Obrazac za brojno stanje Posebnog mobilnog tima

- g) Obrazac za zbirne rezultate ZR – većinski glas (za biračko mjesto, za Glavni centar za brojanje i izbornu komisiju),
- h) Obrazac za zbirne rezultate ZR – proporcionalna zastupljenost (za biračko mjesto, za Glavni centar za brojanje i izbornu komisiju),
- i) Pomoćni obrazac za brojanje,
- j) Obrasci izgleda koverti za nepotvrđene-kovertirane glasačke listiće i za mobilne timove i za Posebni mobilni tim,
- k) Primopredajni obrasci PO,
- l) Primopredajni obrazac PO5 IS
- m) Primopredajni obrazac BO-IK ,
- n) Zapisnik sa otvaranja vreće,
- o) Pomoć drugog lica – PDL obrazac i
- p) Zapisnik o primopredaji glasačkih listića – ZPGL.

Član 94.

(Obaveze učesnika u izbornom procesu)

Svi učesnici u izbornom procesu će aktivnosti propisane ovim Pravilnikom provoditi po preporukama i mjerama koje su propisali nadležni organi u Bosni i Hercegovini za vrijeme trajanja stanja prirodne nepogode i druge nesreće, odnosno vanredne situacije.

Član 95.

(Prestanak primjene)

Danom stupanja na snagu ovog Pravilnika prestaje sa važenjem Pravilnik o provođenju izbora u Bosni i Hercegovini – prečišćeni tekst ("Službeni glasnik BiH", br. 25/20, 38/20, 63/20, 70/20 i 72/20) i Instrukcija o načinu unosa, obrade i kontrole izbornih rezultata za Lokalne izbore 2020. godine, broj: 05-1-02-2-397-1/20 od 06. 05. 2020. godine.

Član 96.

(Objava)

Ovaj Pravilnik stupa na snagu danom objave u "Službenom glasniku BiH", a bit će objavljen u "Službenim novinama Federacije BiH", "Službenom glasniku RS", "Službenom glasniku Brčko distrikta BiH" i internet-stranici Centralne izborne komisije BiH www.izbori.ba.

Broj: 05-1-02-2-615-1/22
Sarajevo, 04.05.2022. godine

